



pngelectionprinting.com



POSTERS BANNERS CARDS A-FRAMES FLYERS CAR STICKERS CORFLUTE SIGNS

Parkop tokaut long SD pati polisi

Paul Zuvani i raitim

Nesanel Kapitel Distrik i tok.

STRONGIM ikonomi i bikpela salens bilong nupela gavman bi-hain long Julai Jeneral Ilekse, Powes Parkop, Gavana bilong

Parkop husat i palamentari lida bilong Sosel Demokratik (SD) pati tu i mekim displea tok taim pati i tokaut long ol polisi bilong em long Pot Mosbi long dispela wik.

Em i tok pati bilong em i laik kamap memba bilong gavman husat i mas strongim gen ikonomi.

Em i tok bikpela lukluk bilong pati em long kamapim transpot

infrastraksa na opim ol rot, ples balus na sanapim ol bris long kantri.

I go moa long pes 3...

Tenkyu Kila Haoda: Monique Koal wantaim (kago trol) i sanap wantaim ol famili bilong em long Jackson ples balus bipo long em kisim balus i go long Malaysia. Monique i stap namel long 35 Sentral sumatin husat i winim skolasip bilong Kila Haoda. Em i hap bilong wanpela 10 yia program bilong Kila Haoda Skolasip. Em i bin stat long las yia. Lukim stori long pes 9... *Poto Nicky Bernard.*



Birua long rot kamap bikpela long Madang



P7

Raipostail Gras i karamapim Bogia gavman stesin - P14



NRL ROUND 5

31st March 2017 at 1300 Smiles Stadium, Townsville

COWBOYS **V** **RABBITOHS**

Convenient direct flight service to Townsville

FROM K2,410*

PER PERSON / TWIN SHARE

3 Nights package includes:

- Return airfares Port Moresby to Townsville
- 3 nights accommodation
- Full buffet breakfast in Celsius restaurant
- Return airport transfers
- Return transfers from hotel to stadium
- Game ticket
- All travel taxes and surcharges

Air Niugini Call Toll Free on 180 2121
www.airniugini.com.pg for more information.

* Strict conditions apply. Valid for 31 March to 2 April 2017 only.

Pot Mosbi dentel Klinik laikim helpim

...Sikman laik kisim namba na bungim birua

Veronica Hatutasi i raitim

SINGAUT i go long Helt Di-patmen na gavman long mekim samting nau long putim wanpela Dentel Klinik bilding bilong pablik long Pot Mosbi Jenerel Haus sik.

Dispela klinik i ken sevim planti manmeri na pikinini insait long Mosbi siti i gat sik bilong tit.

Dispela singaut i kamap bihain long wanpela yangpela man i bin kisim bikpela bagarap long han bilong ol raskol long las wik Tunde Mas 14, taim em i laik go long Pot Mosbi Jenerel Haus sik long bikmoning long kisim dentel sevis na tritmen long tit i pen.

Long dispela taim, dentel klinik long Pot Mosbi Jenerel Haus sik i save kisim na givim tritmen long 20 pipel tasol i gat sik long tit insait long wanpela de, stat long Mande i go long Fraide olgeta wik.

Olsem ol manmeri na pikinini i gat sik long tit olsem hul long tit na titi i pen, rausim tit na long pulumapim ol tit i gat hul long en, i mas go long haus sik long bikmoning long kisim namba, stat long namba 1 inap long namba 20 tasol.

Yu kam bihain long dispela namba mak, sori tru, yu bai no inap kisim sevis.

Dispela tasol i mekim na sampela manmeri i save lusim haus bilong ol long 3

na 4 klok bikmoning na wokabout i go long Pot Mosbi Jenerel Haus sik Dentel Seksen long stap insait long namba 1-20 namba.

Long wankain taim, Wantok i kisim sampela tingting long wanpela woklain bilong Dentel Klinikna i laikim gavman long wokim samting nau long dentel bilding na 10-pela sia we em i bin promisim ol 4-pela yia i go pinis.


“Mipela i laikim dispela bilding na 10-pela sia we gavman i bin promis long givim 4-pela yia i go pinis. i kam inapo nau, mipela i operet long dentel klinik bilong ol lain long UPNG skul bilong ol dokta bilong tit. Em i no bilong ol jenerel prektisina dentis.

“Mipela i yusim tasol tu-pela sia bilong wok na olsem, mipela i kisim 20 manmeri na pikinini i gat sik long tit,” dispela woklain husat i no laikim bai nem bilong em i kamap long niuspepa i tok.

Sampela ol narapela manmeri i wet long lukim dokta bilong tit i autim wari long sefti bilong ol lain i laik kisim sevis.

Ol i tok bikos long mak bilong 20 siklain long wanpela de na ol man i save kamap long Pot Mosbi Jenerel Haus sik long bikmoning yet na wanpela i bungim birua pinis.

Ol i laikim bai dentel klinik i kisim moa lain i gat sik long tit, abrusim dispela 20 mak.



Don Polye, Oposisen lida.

Polye: Karamui-Nomane ken kamap basket kaikai bilong PNG

KARAMUI-Nomane i ken kamap basket kaikai bilong Papua Niugini, Oposisen lida Don Polye i tok.

Em i tok sapos pati bilong em Triumph Heritage Empowerment i helpim long kamapim gavman bihain long Julai ileksen, em bai laik lukim bikpela wok egrikalsa i mas kamap long Karamui.

“Mipela bai tanim ol plein olsem Sepik, Karamui, Papua basin, Waghi, Hela, Baiyer, Markham na Niugini Ailan i kamap basket kaikai,” Polye i tok.

Em i mekim dispela tok taim em i go long Karamui distrik long las wiken long opim 46 futbris na 33 kilomita rot we distrik i kamapim.

Olgeta dispela ol developmen i kamap long mani mak bilong K100,000 wantaim helpim bilong ol lokal manmeri.

“Taim mi kamap memba stat long 2002, mi tok strong yet long go insait long wok bilong didiman long Karamui-Nomane.

“Dispela i no namba wan taim mi tok olsem. Mi wok long toktok yet. Olgeta tok pait long dispela wok i stap long rekot long Palamen,” em i tok.

Em i sutim tok long gavman long givim baksait long ol gutpela toktok em i save kamapim na singaut long Praisim Minista Peter O’Neill long putim mani i go insait long ol hap olsem.

Em i tok bekim long gavman i putim mani, em bai lukim moa gutpela ol mak long invesmen bilong em.

“Taim mi stap Tresari Minista, mi save givim tok long kisim dinau long kirapim kain projek olsem na long kamapim ol gutpela rot bai ol manmeri i ken go long ol maket na salim ol samting bilong ol.

“Tasol Praisim Minista (O’Neill) i sakim tok na developim ol rot long Mosbi tasol.

Polye i wari olsem gavman i no mekim wanpela samting long tam ol kakau, pinat, rais, painapel na ol arapela samting i wok long go sting bikos long hevi bilong rot.

Em i tok long taim em i stap Woks Minista, em i putim mani long 73 kilomita ol rot long konektim distrik wantaim ol narapela hap bilong provins.

Hevi bilong lo na oda mekim helt wokman lusim wok

James G. Kila i raitim

BIKPELA ren i pundaun na ples i tudak tru. Nogat sekuriti banis i stap tasol ol sikman meri na pikinini i stap insait long Bogia distrik helt senta na wet long kisim marasin.

Dispela em wanpela bikpela hevi nau i stap long Bogia gavman stesin. Turangu maski olsem em nait ol sikman stap long haus sik long tudak. Sampela pret na stap isi stret bikos nogut ol lain dringim hombru ‘yawa’ harim ol na go mekim nabaut long ol.

Hevi bilong lo na oda i go bikpela nau long Bogia stesin na planti ol wokman meri bilong helt olsem ol komyuniti helt woka (CHW) na ol dokta i no laik stap wok long hap. Ol i lusim wok na go aut bikos sefti bilong ol i no

Bogia Distrik Helt menesa, Ruth Wasami i tok olsem lo na oda hevi em as bilong

Ol wod long Bogia distrik helt senta i sanap insait long bus na nogat banis long ol. Nau tasol ol lain bilong Mambuan ples i katim as blong kokonas long sanapim pos bilong banis arere long rot. Ol foto: James G. Kila



planti ol lain CHW i lusim wok-ples na mov aut long Bogia stesin.

Mis Wasami i tokaut tu olse wanpela hevi nau i wok long kamap long Bogia stesin em ol lain bilong baim buai i wok long go kam long baim buai long Bogia na Ramu na save yusim ol rot-sait maket nau i kamap long Bogia stesin. Dispela lain i save

Wantok Niuspepa long las wik i bin wok raun i go olsem long Bogia na lukim olsem planti ol sevises long Bogia i

no go stret. Gavman stesin em bus karamapim na eria long Bogia hausik tu em bus na nogat gutpela lukaut i stap long en. Long nait nogat pawa saplai i go long hausik na turangu ol sikman meri na pikinini i save slip long tudak insait long ol wod.

Wanpela yangpela man nem bilong em Godfried Atingani bilong Mikarep i tok em i karim pikinini meri bilong em long go kisim marasin long haus sik tasol

nogat lain i sekim em na em i stap long haus sik long wetim wanpela dokta o helt ekstensen opisa long raitim pepa na ol bai go long bikpela Modilon Haus Sik long Madang taun long kisim marasin long hap bikos nogat dokta long Bogia.

“Mipela no gat ol dokta long lukim mipela. Ol dokta i pret long stap wok long Bogia bikos ol bikhet man pulap long hia na hevi bilong lo na oda em antap tru na ol pret long laip bilong ol.”

Also available in 200g

goodman fielder

Skel Rice MEDIUM GRAIN

SMILES AT MEAL TIME

Parkop tokaut long SD pati polisi...

I kam long pes 1...

SDP i kamap long 2008 na 2012 i namba wan taim em i sanapim ol kendidet long resis long 2012 Jeneral Ilek-sen na 2017 bai namba tu taim.

"Mipela i mas opim rot long Madang i go long Sepik, go long Jayapura long Wes Papua, stretim Hailans Haiwe, opim rot long Is Nu Briten i go long Wes Nu Briten na raun olgeta ples long Wes Nu Briten. Wantaim dispela mipela i mas stret rot long Pot Mosbi i go long Galp provins," em i tok.

Parkop i tok long dispela taim SDP bai wok tasol wantaim kolisen gavman we O'Neill i go pas long em inap long taim ol i go long ileksen. Em i tok gavman i no ken wetim prais bilong gol na kopa i go antap bipo long em i statim wok.

Long strongim ikonomi Parkop i tok bihain long ileksen sapos pati bilong em i stap insait long gavman em bai kamapim kain wok olsem:

- Tok orait long ol wok developmen bilong Wafi-Golpu gol main long Morobe, Frieda kopa main long Wes Sepik na Elk Antelope ges projek long Galp;
- Salim sampela sea bilong Oil Search i go, kisim mani na kamapim ol projek olsem wokim Hagen Madang Haiwe;
- Kamapim pemanen Tred Embasada long promotim ol prodak

bilong kantri na painim maket long salim ol samting bilong kantri;

- Ristraksarim na bungim wantaim sampela dipatmen na organaisesen we i mekim wok klostu wankain; na
- Promotim Lo na Jastis Sekta we i kamapim bel isi long komyuniti.

Parkop i askim ol manmeri long ol i no ken tingting planti long hevi bilong mani long wanem planti kantri long wol nau i wok long bungim wankain hevi.

"Long histori, kain sindaun i bin kamap planti taim na wanpela i no ken tingting planti," em i tok.

"Pati (SDP) bilong mi i bilip sekyuriti na bel isi i ki bilong kamapim kwaliti laip wantaim gutpela ikonomi na gutpela stap bilong kantri."

Parkop i tokaut tu long 6-pela promis bilong SD pati:

- Bringim klinpela wara na pawa long ol manmeri;
- Apgredim ol setlemen i kamap sabeb na taun;
- Kamapim lo we i lukim olgeta pikinini i mas go long elementeri na praimer skul;
- Tok strong long Inpendens bilong Wes Papua;
- Pinisim Wes Minista gavman sistem na kamapim presidential gavman sistem; na
- Strongim Bogenville Pis Akod.

PNGCLA na NACS holim bikpela Kristen lida miting long HIV/AIDS

Josiah Ururu Kana i raitim

PAPUA Niugini Kristen Lida Alaiens long HIV/AIDS (PNGCLA) wantaim Nesenel AIDS Kaunsil i bin holim namba wan bikpela miting o samit bilong ol Kristen lida na wokman na wokmeri long ol lain i gat hevi long HIV na AIDS.

Dispela miting i bin kamap long las wik de 15 na 15 Mas long Pot Mosbi. Insait long tupela de miting ol bikpela het ov sios na ol program lain bilong ol sios na ol narapela patna ogenaisesen olsem Yunaitet Nesens, Wol Visen, Australia Gavman na ol narapela i kamap long givim tingting bilong ol na pasim tok long ol we bilong sios inap long helpim long daunim hevi bilong dispela sik.

PNGCLA i bungim tingting wantaim ol het ov sios long soim lidasip sapot long ol hevi bilong HIV na AIDS na ol narapela hevi we i save bagarapim laip bilong ol pipel long PNG.

Tingting bilong kamapim dispela samit em long lainim ol het ov sios long HIV na AIDS na ol rot we ol inap long senisim tingting bilong ol pipel long ol sios bilong ol.

Samit i bringim ol sios lida na wokman na wokmeri long olgeta hap kona bilong kantri i kam bung wantaim. Namel long ol em namba wan kadinel bilong Katolik Sios long PNG, Sir John Kadinel Ribat. Em i bin stap wantaim Modereta bilong Yunaitet Sios, Reveren Bernard Siai, Teritorel Seketeri bilong Salvesen Ami, Kenel Kelvin Alley na ol narapela bikpela sios lida.

Ol sios na ol patna i bin bringim ol ripot na rekomendesen wantaim ol



Ol patna long HIV/AIDS wantaim PNGCLA memba i wanbel long wok wantaim. Poto: Nicky Bernard.

NGO na ol Lo Ejensi long ol hevi bilong dispela sik wantaim Stigma na Diskriminesen o pasin bilong daunim ol narapela bikos long dispela sik.

Valentine Tangoh, Rijonal Menesa bilong Nesenel AIDS Kaunsil Seketereit i givim tok tok long mak bilong HIV nau i stap olsem wanem long kantri. Em i lukluk long ol ples na ol kain pipel husat i save gat bikpela sans o birua long kisim dispela sik o kisim ol narapela hevi bikos long dispela sik HIV.

Ol mak bilong HIV nau long PNG em i bin kamap long dispela taim long ol lida i kam bung.

"PNG i stap antap tru long mak bilong ol manmeri i kisim sik HIV insait long ol Pasi-fik rijon, na em i save stap moa long ol hap we planti pipel tumas i stap," Mista Tangoh i tok.

"Ol ripot bilong NACS i soim olsem Enga provins i go pas wantaim mak bilong 1.12 pesen bilong populesen, Ji-

waka wantaim 1.6 pesen, na ol narapela provins i go daun aninit long tupela wantaim NCD," em i tok.

Em i toktok long ol namba wan bikpela samting em long tok strong moa long yusim ol samting bilong banisim ol man na meri long kisim binatang bilong HIV olsem ol kondom o gumi na long bungim ol wok bilong HIV i go insait long helt sistem moa.

Long wankain taim Kantri Dairekta bilong UNAIDS, Stuart Watson i toktok long samit long ol ripot bilong Yunaitet Nesen long rijon na long wol.

"Las ripot i tok olsem dispela bikpela hevi i go antap long wol gen i go long 0.7 pesen i winim long las yia mak bilong 0.9 pesen. I gat 46,500 lain husat i kisim binatang bilong HIV na 1500 dai i kamap pinis long las yia," Mista Watson i tok.

Mista Watson i tok long ol lida na ol ki ogenaisesen i mas hariap long mekim samting long stopim dispela long no ken gro moa.

"Mi no laik toktok long kamapim ol nupela rot o plen

moa tasol mi tok long yumi mas luksave na mekim wanem samting yumi inap long mekim hariap wantaim tingting bilong ol ki pipel long ol plen bilong yumi," em i tok.

Narapela man i makim UN, Adekemi Ndieli, Deputi Kantri Dairekta bilong UN Wimen i toktok long ol mak bilong ol meri long PNG na long wol i no wankain.

Narapela meri husat i makim wanpela NGO, Igat Hope Foundation, Carol Hobbin i toktok long ol hevi i save kamap long ol lain husat i gat binatang bilong HIV.

"I gat 70 pesen bilong ol pipel husat i gat hevi long HIV i save kisim hevi long skin bilong ol na ol i save pilim seif long stap long komyuniti," em i tok.

Mis Hobbin i tok i mas gat moa awenes long ol pipel husat i gat HIV na AIDS long ol narapela lain i no ken lukdaun long ol na bagarapim ol nating bikos ol i gat dispela sik. Em i singaut long ol sios lida long ol i mas kamapim ol dispela kain save long helt edukesen long HIV insait long ol sios bilong ol.



2

Achieve your goals with the right attitude. Use the **PLUS SAVER** Account for that regular deposit.

We are the Bank for Savings

WE ARE BSP





Gelu: Pati mas gat oda, wok bung wantaim

Paul Zuvani i raitim

OL politiken pati i mas gat straksa, oda na ol memba i mas wok bung, Rejistra bilong Politikel Pati na Kendidet Dokta Alphonse Gelu i tok.

Dispela i min i mas palamentari lida o sapos no gat i mas gat Jenderal Seketari, presiden, deputi presiden na tresara.

Dokta Gelu i mekim dispela tok taim Sosel Demokratim Pati (SDP) i tokaut long polisi na promis bilong em long Mosbi long dispela wik.

"Ol palamentari lida o ol eksekutiv i no ken tok em pati bilong ol. No gat. Pati i stap bikos ol memba i stap. No gat memba no

gat pati. Long dispela as stap bilong ol memba i bikipela samting," em i tok.

"Sosel Demokratik Pati i liklik pati tasol.

"Maski pati i liklik em i kamapim planti samting pinis olsem Gavana yet i stap.

Em wei ol pati i mas wok bihainim tok promis bilong ol.

"Mi olsem rejistra bilong politikel pati na vota long Nesenel Kapitel Distrik i tok mi luksave long ol senis i kamap long Mosbi na mi tok olsem em wok bilong lidaman long em i mas mekim o kamap mausman bilong ol manmeri long palamen.

"I no ol bikipela samting wanpela i mas mekim tasol ol liklik samting

i min bikipela."

Dokta Gelu i t ok sapos wanpela i go raun long ol narapela kantri olsem Australia wanpela bai lukim ol wok we hetman bilong wan wan ol siti i mekim bihainim ol polisi na promis ol i mekim bipo long ol i win na kisim sia.

Em i tok sapos wanpela i go raun wanpela bai lukim ol wok manmeri i klinim ol strit, putim ol krismas lait long taim bilong krismas na putim ol TV skrin long taim bilong Stet ov Orijin pilai.

"Dispela ol liklik samting tasol i min bikipela long ol manmeri husat i stap long dispela ol hap.

"Parkop i bihainim na kamapim wankain wok na olsem ol manmeri i mas amamas.



Dokta Alphonse Gelu, Rejistra bilong Politikel Pati na Kendidet. Foto: Intanet

Dokta Gelu i tok dispela em ol mak bilong SDP.

Em i tok long dispela as olgeta taim em i kamap long nius long strongim ol politikel pati long ol eksekutiv na ol memba i mas wok wantaim.

Deputi Hai Komisina bilong Australia, Bronte Moulès (namel) i katim ribbon long amamasim dispela bung.



Arawa Kieta rot mekim isi long manmeri

WANPELA bung i bin kamap long las wik long amamasim apgred wok na silim bilong Arawa Kieta rot long Atonomus Rijen bilong Bogenvil.

Dispela rot i bilong ol manmeri long yusim na long wankain taim long bringim ol kago long Arawa i go long Kieta bris o kisim ol kago long Kieta na go long ol arapela hap bilong rijon.

Dispela apgret rot em Australia Gavman i helpim long mekim long mani mak bilong K8.6 milien.

Dispela mani inapim tu K4.7 milien mani mak em Australia i givim long putim kolta long ol rot long Arawa taun.

Bikos long ol gutpela rot, dispela i daunim taim bilong ol manmeri long go i kam long ol ples we ol i laik go long em olsem long wok bisnis long Arawa, kisim balus o kisim sip long Kieta.

Seketeri bilong Teknikel Sevises Dipatmen Bogenvil, Bernard Tzilu i amamas tru long senis i kamap long dispela ol rot.

"Dispela projek i soim gutpela kamap wok bung namel long Australia na Bogenvil," em i tok.

"Dispela rot i mekim ol manmeri i ken ron gut na i no inap long kisim bagarap. Gutpela rot bai helpim ol manmeri long wok bisnis tu.

"Kain ol projek bai givim sans long kamapim wok bilong ol lokal manmeri."

Gutpela trenspot netwok long Bogenvil i stap bilong kamapim ol samting olsem kaukau na ol manmeri i ken salim kakau na gaden kaikai long mekim mani.

Dispela bai daunim tu wok bilong ranim ol kar bikos ol i no inap long go bagarapim hariap.

Deputi Hai Komisina bilong Australia, Bronte Moulès i katim ribbon long amamasim dispela bung.

"Kamap bilong dispela projek i lukim ol manmeri i ken kisim gut sevis long sait bilong helt na edukesen na long ol manmeri i go i kam long mekim bisnis," e m i tok.

"Kamapim ol gutpela rot i hap wok bilong Australia long lukim olsem Bogenvil i develop gut.

Kain sapot i save kamap aninit long PNG – Australia Trenspot Sekta Sapot Program.

AUTIM TINGTING

Dia Edita, mi no amamas tru long taim mi ritim Wantok Niuspepa taim minister bilong Sandaun Amkat Mai i askim minister bilong Sivil Aviesen Davis Steven. Kantri i gat 22 setifait ples Balus tasol bilong wanem na Taji ples balus long Aitape, West Sepik Provins gavman i no inap stretim. Na minister Steven i tok olsem Taji ples balus i no stap long lista long stretim. Taim mi ritim dispela stori mi no amamas tru long minister Bruats em memba bilong Aitape/Lumi open em sapos long stretim Taji ples Balus na Aitape wof na Aitape/Lumi rot na senisim Aitape taun, tasol em i no mekim wanpela samting long Aitape taun. Mipela makim em 15 yia nating tru tasol em i no mekim samting stret. Olsem na olgeta manmeri long Aitape/Lumi open noken makim minister Bruaits long 2017. Em i mas lus long dispela yia. Tenkyu.

Kambotu Lopex Aitape, West Sepik

Dia Edita mi wanpela we i save painim hap long rent na mi save go raun na lukim ol ples na niuspepa. Mi save lukim ol prais bilong ol haus ya i antap tru we samting olsem olgeta pe bilong yumi nau bai i save go long ol dispela rent haus or yunit tasol. Dispela em i bikipela samting hia long Papua Niugini, na mi no wanbel tru long dispela. Mipela i gat ol pikinini, brata, susa i go long skul we mipela i laik helpim na i hat bilong wanem olgeta fotnait pe i go long rental tasol. PM i tok olsem ol dispela samting i bai go daun na Kantri i wok long kamap gut tasol olgeta samting i sem yet. Olgeta prais bilong ol samting long stua i dia tumas, siti em laip i hat na ol lain we i gat wok tu i wok long painim hat. Olgeta samting yumi mas i baim tasol, i no gat samting bai yu kisim fri. Planti ol nupela developmen i kamap na laip na sindaun bilong mipela ol manmeri bilong Papua Niugini i no stap gut. Planti hevi i stap yet. Olsem tasol inap ol Praim Minista o lidaman bilong mipela i lukluk long dispela na mekim samting long daunim prais na helpim ol manmeri bilong dispela Kantri PNG.

Konsen Sitisen

URGENT!!

URGENTLY REQUIRE STREET SALES AGENTS & DISTRIBUTORS TO DO BULK SUBSCRIPTION OF WANTOK NIUSPEPA IN THE FOLLOWING LOCATIONS

Rabaul, Kiunga, Tari, Jiwaka, Manus, Wabag, Kavieng, Simbu, Tabubil, Lae, Mendi, Bulolo, Popondetta, Wewak, Vanimo and Kerema

Qualification:

No specific qualification is required, can be an individual, family, a retired worker or someone who is already engaged in doing News Paper contract work.

For more detail information please call
The Circulation Supervisor, Mr. Mark Timbi on Phone: 3252500, mobile phone: 72703860/75690395 or email: mtimbi@wantokniuspepa.com circulation@wantokniuspepa.com



PIH Saveman *Nias*

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

For the first time : An Advanced Cardiac Camp in the Eastern Highlands by PIH

21st March 2017

PIH conducts the first Advanced Cardiac Camp in the Eastern Highlands – offering ECHO, ECG, & Free Consultations to the people of Goroka

As part of its Annual Outreach Program for the year 2017, the Pacific International Hospital continues its mission to reach out to as many PNG citizen as possible with advanced medical care offerings, by organizing a 3-day advanced cardiac camp in the town of Goroka.

Collaborating with Dr William Mol from Goroka & the University of Goroka; the camp involved screening of more than 130 patients with suspected cardiac symptoms by Dr William Mol. A total of 82 patients were then examined by Dr. Venkita S Suresh, MD, D.Card (Lon), FRSM (Lon),

FACP, FCCP, FICP, FICC, the Medical Director and Chief Physician (Cardiology and Internal Medicine), Pacific International Hospital.

Dr Suresh is a British Heart Foundation Research Fellow in Heart Failure, a Referee for the British Medical Journal, The Lancet and The Heart, a Member of the Editorial Board, British Journal of Cardiology. Dr Suresh has 68 Publications in national and international journals. And has served the Armed Forces Medical Services of India and Oman as Lieutenant Colonel.

The consultation involved counselling, ECG Tests & ECHO Cardiogram Examinations to give the patient a comprehensive report on the state of his/her heart and the possible precautions that need to be taken to ensure its good health.



ANY CHEST PAIN CAN BE DANGEROUS



PIH CHEST PAIN CLINIC

IF YOU ARE FACING ANY OF THESE PROBLEMS :

- CHEST PAIN
- CHRONIC COUGHING
- DIFFICULTY IN BREATHING
- BLOOD IN SPUTUM

FREE SCREENING

**BOOK NOW
CALL US AT
7998 8000
EXT 135**



Trukai sekyuriti i joinim RPTP



Senia Konstabal, Tony Hasu, long han kais na Senia Konstabal, Michael Amefe, han sut wantaim ol 8-pela sekyuriti bilong Trukai Industries greduet long Risev Polis Trening Program.

SEKYURITI bilong Trukai Industries i joinim Risev Polis Trening Program (RPTP) bilong Royal Papua Niugini Konstabuleri bihain long ol i bin sainim Memorandum ov Andastending (MOU) long Janueri.

Namba wan grup ol i bin makim long ol wokman bilong Trukai Industries em ol i bin pinisim namba trening bilong ol long las wik Fraide, 17 Mas.

Patnasip i lukim Trukai Industries redim wanpela namba wan strongpela grup long ol 8-pela Trukai Sekyuriti Pesenel long kisim Trukai Polis Risevis Kos. Dis-

pela kos i bin kam aninit long RPNGC we ol i bin stat long Mas 6 na trening insait long tupela wik.

Ol namba wan sekyuriti opisa bilong Trukai ol i go insait long trening i kisim spesel trening long tripela RPNGC Trening Instrukta long Bomana Polis Kolis.

Taim ol i opim trening, Komanden bilong Bomana Polis Kolis, Sif Supaintenden Perou N'Dranou, i toktok long ol nupela rikrut taim tripela Polis Instrukta long Bomana Polis Kolis, Inspekta Maino Aisa, Senia Konstabal Tony Hasu na Michael Amefe i bin stap

wantaim. CEO Greg Worthington-Eyre na CFO Andrew Lawson bilong Trukai Industries i bin sta wantaim taim ol i pinism namba wan trening bilong ol.

"Namba wan hap bilong tok promis bilong mipela long helpim Royal Papua Niugin Konstabuleri i kam long mak, tasol bikpela wok i stat nau," Worthington-Eyre i tok.

"Nau, Trukai Industries i lukluk long yusim trening skil bilong mipela wantaim polis fos bilong mipela long strongim sefti insait long omyuniti bilong mipela.

PPC Asi i laikim klinpela ileksen long Sentral Provins

SENTRAL Provinsal Polis Komanda (PPC), Laimo Asi, i givim tok lukaut long ol kendidet husat i laik resis long 2017 Nesenel Ilek-sen long mekim klinpela kempen.

Asi i tok olsem ol kendidet husat i mekim sampela korap pasin na sapos ol polis i

painim aut em ol bai holim pasim na sasim ol na bai sanap long kot long taim bilong ileksen.

"Mipela bai lukluk strong long ol korap kendidet na sasim ol long nogut pasin bilong ol na ol bai sanap long kot long taim bilong ileksen," Asi i tok.

Em i tokim ol lokal



Sentral PPC, Laimo Asi

long ripot long polis kwiktai sapos wanpela kendidet i laik kamapim korap pasin na baim vot long taim bilong ileksen.

"Mipela i laikim ol manmeri long komyuniti long vot wantaim rispek aninit long demokretik rait bilong ol," Asi i tok.

Noten Koman i redi pinis long 2017 ileksen

NOTEN Komand polis i mekim plen pinis long raun long 2017 Nesenel Ilek-sen na strongim ol yet long mekim wok gut.

Divisonal Komanda bilong Noten Rijon, Peter Guinness, i tok olsem olgeta polis long rijon i mas bihainim wan wan wok aninit long renk o posisen bilong ol.

Em i tok moa olsem olgeta senia opisa insait long Noten Komand em ol i bin makim ol aninit long stretpela rot na ol bai no inap senisim dispela.

Guinness i tok tenkyu long Komisina bilong Polis, Gari Baki, bilong em i promotim PPC na Lae Metropolitan Sif Suprintenden long rijon.

"Nau ol dispela opisa i gat

ol dispela posisen o renk we ol i gat pawa long stiaim ol polis man na meri," Guinness i tok.

Aninit long Divisonal Stretejik Plen bilong Guinness i lukim olsem ol i sot long haus bilong slip long taim bilong ileksen, olsem na ol bai redim dispela bipo long ol i stat wok.



People connecting Business People



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

Australia sapotim Apec Stadi Senta bilong NRI

AUSTRALIA Gavman i surukim wok poroman bilong em wantaim Papua Niugini long wanpela gutpela skul bilong em, Nesenel Risets Institut (NRI).

Dispela bai helpim NRI i go het yet long givim ol gutpela skul tok bilong em long Gavman bilong Papua Niugini long ol polisi em i kamapim.

Australia Hai Komisina Bruce Davis i tokaut long sapot Australia bai givim long dispela wik.

Dispela sapot i kam long moa long mani mak bilong K3 milien na bai go long ol risets wok na moa long K4 milien bai go long sapotim wok bilong kamapim PNG Esia Pasifik Ikonmik Kopresen (Apec) Stadi Senta long NRI.

Mista Davis i tok olsem pablik na ol skul bilong em yet, NRI i save mekim bikpela wok long sapotim kamap bilong ol gutpela polisi bilong kantri.

"NRI i stap long mak we em inap helpim PNG, husat i kamap olsem wanpela ikonmik lida long rijon, long yusim gut ol busgraun samting na long skulim gut ol manmeri long save long bungim ol taim nogut olsem hevi bilong mani nau kantri i wok long bungim," Davis i tok.

"Skul i save givim gavman gutpela skul tok long kamapim gut ikonmik na long skelim gut mani em i kisim long salim ol risos bilong em.

"Ol askim NRI i save givim i save go insait tru long lewa bilong kantri, em long gutpela kamap bilong kantri, long ol manmeri bilong em na long wok wantaim ol narapela kantri."

Ol projek bilong dispela yia em wok skelim bilong gutpela kamap bilong ikonmik regulesen na kompetisen (wok resis) polisi, wok skelim bilong takis polisi na stadi long sab-nesenel deliveri bilong edukesen sevis.

Ol arapela projek em 2017 risets agenda we i

kisim wok skelim long kamap bilong infomel ikonmik na stadi long ol eksperiens bilong ol meri long stap insait long 2017 ileksen.

Ol saveman bilong NRI bai skruim yet wok bilong ol long painim gutpela rot long rejisterim ol kastomari graun bai ol man o oganaisesen i ken lisim long sanapim ol haus na mekim wok bisnis.

Sapot bilong Australia long kamapim Apec Stadi Senta i bihainim singaut gavman bilong PNG i mekim long makim NRI i ples bilong holim kain skul olsem.

"Dispela long lukim NRI i stap insait long senta we i redi gut long holim ol toktok bilong Apec 2018 na skul bai wok wantaim PNG Apec Sekretariat long kamapim ol polisi bilong dispela kibung," Davis i tok.

"Mi save em bai go het yet long go pas long



kamapim ol gutpela tingting long dispela kibung na ol arapela bikpela wok."

Gavman bilong Australia i save givim teknikal sapot long NRI na helpim long kamapim gutpela wok bung namel long skul yet na ol yunivesiti long Australia.

Dispela sapot i kam

Birua long rot kamap bikpela long Madang

James G. Kila i raitim

MADANG provins insait long las tupela wik i go pinis i wok long lukim hevi long rot i kamap planti na dispela lukim tu dai i kamap.

Long Mande moning tasol, ol skul sumatin na ol wok lain i guria stret long lukim wanpela ten-sita Toyota lenkrusa kar i pundaun na slip aninit long bris klostu long mausrot i go insait long Madang Risot Hotel.

Dispela lenkrusa em wanpela menesa bilong Marengo Maining kampani i draivim na ripot i tok olsem em spit na abrusim pawa lain na ain long bris na sutnus i go daun long solwara.

Dispela waitman em sampela lain i sevim em na em no kisim bikpela bagarap tumas. Ol i rausim waitman ya na kar tasol i waswas i stap taim ol skul sumatin na wok lain i go na lukim long moning taim.

Insait long narapela birua long rot i lukim wanpela het tisa bilong Kusbau praimeru skul i



Kar bilong wanpela bosman bilong Marengo Maining i stap insait long solwara aninit long bris klostu long mausrot i go insait long Madang Risot Hotel.

lusim laip bilong em las wik Tunde, Mas 14 taimlenkrusa kar em i sindaun boskru long en i bamim wanpela semitreila trak klostu long Pau maket long not kos rot (NCR).

Madang Provinsal Edukesen Dairekta, Moses Sariki i tokim media lain olsem het-tisa bilong Kusbau praimeru skul nem bilong em Awak Abui i bin dai taim kar i bam

na narapela man em praimeru skul inspekta, Jessy Koru i bin kisim bikpela bagarap long bodi bilong em.

Sariki i tok tupelo man i bin go long Kubugam long bung

wantaim MP bilong Sumkar long redim haus bilong nupela Sumkar distrik skul inspekta na taim ol i draiv i go bek long Madang em birua i bungim ol.

Sariki i tok olsem Mista Koru i bin draivim kar na Mista Abui i bin sindaun opsait long em taim ol i bungim dispela birua.

Em i tok Mista Koru i stap yet long Modilon Haus Sik na bodi bilong Mista Abui i stap long mog long wok painimaut o postmortem i kamap.

Plantu ol papamama bilong ol sumatin na ol tisa long Kusbau i sore tru long leit Mista Abui bikos em wanpela sinia Edukesin wokman husat save helpim gut ol papamama taim i gat hevi long spes long putim pikinini long skul.

Plantu lain i autim wari na sori long dispela gutpela papa husat save helpim plantu lain long Madang provins long sait long edukesin bilong ol pikinini na tu ol tisa.



CTSL

TRUSTEE FOR THE DEFENCE FORCE RETIREMENT BENEFIT FUND

TOKSAVE IGO LONG OL PENSENAS

Comrade Trustee Services Limited (CTSL) ilaik toksave long ol pensenas bilong Defence Force Retirement Benefit Fund olsem wok bilong stopim pensen ikamap klostu. Dispela wok bai kamap long namba wan fo nait, long namba fo mun long dispela iar.

Long dispela toksave mipela singaut long ol pensensas istap nambaut long Papua Niu Guinea bai pulamapim wanpela pepa mipla kolim long **'Pension Form'**. Sapos yu pulamapim pinis dispela pepa em bai pensen bilong yu bai orait tasol bihain long dispela taim. Sapos yu no pulamapim yet dispela pepa, em bai yu asua na kisim bikpela taim, taim mipela stopim pensen bilong yu. Olsem na bai gutpla sapos dispela toksave iken go kamap long iau bilong olgeta pensenas.

Long kisim moa toksave, kam steret lo opis bilong CTSL or ring kam long ol namba tamblu:

Memba Sevis Opis lo Giraun Plo, Comrade Haus, Seksen 35 Lot 4, Comrade Ples, Hohola, P.O Box 497, Port Moresby, **Telepon:** +675 323-3651/7998-909 **Kwik Piksa:** +675 323-9856 **Email:** benefits@ctsl.com.pg **Website:** www.ctsl.com.pg

Tok Orait Ikam Long Ol Biklain CTSL

Ol opisa bilong Nesenel Risets Institut na Australia Hai Komisen i sanap long haus we bai kamap Apec Stadi Senta.
Poto: AHC

aninit long developmen patnasip na i lukluk moa long strongim pasin bilong gutpela wok menesmen na gavanens.

Nogat Nupela Rot long Not Kos Rot Madang

James G. Kila i raitim

Solwara klostu bai rausim hap rot bilong Madang-Bogia haiwe long Matugar viles, Sumgilar LLG long Sumkar distrik, Madang provins.

Ol pipel bilong Matugar viles i tokaut pinis olsem ol bai no inap tru larim gavman o wanem kampani long wokim nupela rot gen long graun bilong ol sapos solwara i rausim Madang-Bogia Haiwe klostu long viles bilong ol.

Bikpela askim bilong ol pipel em gavman mas wokim ston-wol long stopim solwara long brukim graun na surik i go long viles na haus-lain bilong ol.

Dispela bikpela rot we i save sevim tripela distrik long Madang na moa long hundred tausen pipel i stap long bikpela pret tru nau bikos solwara i brukim arere bilong nambis na klostu taim bai rausim rot olgeta.

Ol pipel bilong Matugar i bin mekim askim bilong ol i go pinis long Dipatmen ov Woks long Madang na tu long Madang provinsal gavman

Ol lida long Matugar viles to nogat nupela rot bai kirap long graun bilong ol.



wantaim Nesenel Memba (MP) bilong ol long wokim kamap ston-wol long stopim solwara long go antap. Tasol inap tude nogat gutpela bekim na wok tu i no kamap yet long wokim kamap ston-wol.

Long las wik Wantok Niuspepa i bin stap long Matugar viles long wanpela aweanes bilong Dip Si Teilings Plesmen (DSTP) we ol lida long hap i autim bel wari bilong ol long solwara i wok long surik surik na brukim graun na rausim ol diwai long nambis na

muv i go antap long ples bilong ol.

Dispela DSTP aweanes em ol lain bilong Madang provinsal gavman, Mineral Risoses Atoriti (MRA), Konsevesen na Enviromen Proteksen Atoriti (CEPA) i bung wantaim nikel/kobalt main developa Ramu NiCo (MCC) long tok-save long ol pipel long rot em kampani save rausim teilings o pipia bilong maining long solwara long Basamuk long Raikos distrik.

Siaman bilong Sarky Asosesin long Matugar viles, Michael Badui i

tokim Wantok Niuspepa long las wik olsem bikpela askim bilong ol pipel em gavman mas wokim kamap ston-wol long nambis bilong Matugar viles. Dispela bai banisim solwara long brukim moa graun na rausim Madang-Bogia haiwe.

Em i tok dispela Madang-Bogia haiwe em nesanel rot na Nesanel Gavman wantaim Woks Dipatmen mas hariap long mekim samting long stretim.

Madang-Bogia haiwe save sevim Madang distrik,

Sumkar, Midel-Ramu na Bogia distrik long Madang provins. Em save sevim tu ol pipel bilong Is na Wes Sepik husat save yusim long go long Madang.

Mista Badui i tok dispela haiwe i sevim tripela distrik we i save givim bikpela sapot long ekonomi bilong Madang provins long sait long agrikalsal kes-krop olsem kakao, kopra, kakao, buai na ol arapela ekonomik wok. Moa long en tu ol lain long ol Sepik provins save yusim dispela rot tu long go long Madang.



Yangpela man i soim solwara i brukim nambis na klostu bai rausim rot nau. Foto: James G. Kila

Goilala sumatin meri winim Kila Haoda skolasip

Paul Zuvani i raitim

TINA Tou husat i pinisim Gred 12 las yia long wanpela skul long Mosbi i amamas long winim Sentral Provins Kila Haoda skolasip na go skul long Malaysia.

Tou i amamas long wanem em i lukim dispela awot olsem namba tu sans bilong em long skruim skul bilong em i go moa.

Em i wanpela bilong ol 19 Sentral provins sumatin husat i lusim kantri long dispela wik na bai go skul long Seri Stamford Koles.

Tou i tok em bai wok hat long pinisim gut skul bilong em, kam bek helpim famili, Sentral provins na kantri wantaim.

Anti na wasmeri bilong em, Anna Girara i tok em i amamas na tok tenkyu long Gavana Kila Haoda long kamapim dispela skolasip.

Namba wan Goilala sumatin i go pinis long Malaysia na Tina i namba tu long go.

I gat narapela 5-pela sumatin i stap yet long go.

Girara i tok: "Mipela i

tok tenkyu long Gavana na Memba bilong mipela tu, William Samb long kamapim dispela skolasip na sapot bilong ol long pikinini bilong mipela.

"Olgeta papamama bi-hain long ol i hatwok long bringim pikinini bilong ol i amamas taim pikinini bilong ol i go na mi olsem anti na wasmeri bilong Tina i amamas long lukim Tina i go olsem," em i tok.

Long wankain taim Fes Seketari bilong Samb, Evelyn Tasol i tok tenkyu long Gavana Haoda long kamapim dispela program bilong skolasip.

"Long taim mipela i kisim tok long 6-pela sumatin bilong mipela i winim skolasip we Tou i namba wan meri long dispela grup long go, Goilala Distrik Development Atoriti i tok orait long helpim ol sumatin," em i tok.

"Distrik i tok orait long givim K2000 long wan wan bilong ol.

"Bikos Tina i namba wan long go, mi givim dispela mani long em."

Skul long Malaysia...

Long lep han) Monique Koal, Wilhemina Taule na Miria Ume husat i go long Malaysia long skul aninit long Sentral Provins Gavana Kila Haoda Skolasip. Foto: Nicky Bernard



35 sumatin winim Kila Haoda skolasip

Paul Zuvani i raitim

INAP olsem 19 Sentral provins sumatin i lusim kantri na go long Malaysia long skruim skul bilong ol long dispela wik bihain long ol i winim Sentral Provins Kila Haoda skolasip.

Ol i namba tu grup bilong dispela yia long kisim skolasip bihain long 16 sumatin i kisim na go long Malaysia pastaim long dispela yia.

Long narapela mun, Epril ol bai salim narapela 17 sumatin i go.

I gat 46 moa skolasip bilong dispela yia long givim long ol sumatin na dispela em seleksien komiti bai makim long liklik taim.

Kodineta bilong program Lawrence Lahari i tok dispela program i kamap bihain long

tok orait i kamap namel long Sentral Provins Gavman na Jayacorp Holdings Limited, divelopa bilong Ilimo Satellite Siti ausait long Mosbi, long salim ol sumatin i go skul.

Tok orait i bin kamap long 2015 na las yia i lukim namba wan 100 sumatin i lusim sua na go long Malaysia long skul.

Ol sumatin i ken kam long kainkain skul tasol i mas kisim gutpela mak long Gred 12 bipo long ol i ken gat sans long seleksien komiti inap makim ol.

Ol sumatin i ken aplai long ol kos long wan yia long kisim setifiket o foapela yia long kisim digri.

Long winim skolasip wanpela i mas bilong Sentral provins.

Sentral Provins Gavman i makim K2000 long helpim ol

sumatin olsem poket mani bilong ol.

Planti ol papamama husat i lukim dispela ofa olsem namba tu sans long pikinini bilong ol i ken skruim skul bilong ol bihain long ol i no winim wanpela skolasip long skul insait long kantri.

Wanpela bilong ol papa em Steven Koal husat pikinini meri bilong em, Monique i winim ples long go skul long Seri Stamford Kolis long kisim lo.

Koal i tok: "Mipela famili olgeta i amamas long em (Monique) long go.

"Yu save dispela em namba tu sans bilong em bihain long em i aplai long ol skul hia na i no kisim wanpela ofa.

"Mipela olgeta i save olsem taim em i pinis em bai kam bek helpim Sentral Provins na

Papua Niugini wantaim.

Narapela sumatin Miria Ume husat bai kisim turisim na hospitaliti kos long wankain koles i tok em i amamas tru.

"Yes mipela olgeta (wantaim Koal na Wilhemina Taule) i pinisim Gred 12 long St Joseph's Intanesenel Skul (Mosbi) tasol i no kisim wanpela ofa."

"Mi amamas long dispela ofa bikos dispela em i namba tu sans bilong mi," Ume i tok long taim em i bin tok em i tok olgeta rot bilong skruim edukesen bilong em i pas.

Ol sumatin bai go stap na kisim wan wik indaksen o skul tok long Kuala Lumpar bipo long ol i kisim kar na go long Malacca we Seri Stamford Koles i stap.



Lukautim Ol Liklik Bisnis

OL liklik tred stua insait long ol setelmen na ol ples i wok long bungim planti salens nau bikos wanpela bisnisman bilong narapela kantri i go insait pinis na sanapim liklik tredstua bilong em tu.

Ol pipel tu i lukim man lo narapela kantri i kam mekim bisnis na ol i no laik baim moa long man Papua Niugini na ol i go long tred stua bilong man long narapela kantri.

Dispela pasin i no helpim Papua Niugini liklik bikos yumi putim ol liklik bisnis nau i go long han bilong man bilong narapela kantri.

Papua Niugini i gat lo i banisim ol liklik manmeri long mekim bisnis tasol taim ol arapela i kam tekova, yumi ol pipel bai i tok yumi independen tru tru? No gat tru! Yumi givim bisnis long man long narapela kantri na yumi bai ran tasol long em? Yumi kamap olsem ol hangamap manmeri nau insait long kantri bilong yumi yet! Olsem wanem na bai yumi yet mekim yumi hangamap?

Bilong wanem tru ol liklik bisnis manna meri i mas traim hat tru olgeta taim long mekim wok bisnis? Yumi wan wan i mas traim long lukautim ol liklik bisnis maski sapos dispela man o meri em i no wanpisin o wantok bilong yumi. Yumi mas i gat bilip olsem dispela liklik bisnis i givim sevis long yumi na yumi mas traim long helpim em long gro.

Skelim! Olsem wanem na i no gat wanpela bikpela stua em i karim nem bilong Papua Niugini? Inap yumi stat sapatim ol liklik bisnis tru tru, wanpela taim sampela nem bilong Papua Niugini bai i sindaun antap long sampela supamaket insait long kantri.

Insait long sampela kona bilong Mosbi wanpela tred stua i sanap. Wanpela krangki man Papua Niugini i ting em bai i mekim sampela bikpela mani hariap tasol olsem na em i kisim wanpela man long narapela kantri i go ranim tred stua long blok blong em.

Yumi ol liklik man na meri i mas askim olsem wanem tru dispela ol man long narapela kantri i kam long Papua Niugini na mekim ol kain wok we em i bilong ol liklik man meri bilong Papua Niugini?

Tingim! Dispela man long narapela kantri em i kam stap long sotpela taim tasol. Namba wan samting long tingting bilong em, em long mekim sampela bikpela mani hariap tasol. Na olsem wanem long yu dispela mama o papa i traim hat long painim mani bilong salim pikinini long skul? Yu tuhat tasol long painim mani long baim rais na tinpis long stua bilong arasait man? Man i kam long narapela ples em i kam hia bikos em i laik helpim yumi, i no bilong kisim long yumi.

Mani em i no bos. Dispela rais na tinpis em i wankain tasol. Man bilong Papua Niugini em i ples bilong em na em bai i stap hia oltaim. Yu baim long tred stua bilong man Papua Niugini, yu no helpim em tasol, yu helpim Papua Niugini long gro.

Yumi Papua Niugini i gat nid long givim sans long yumi yet, long mekim samting em i gro long han na save bilong yumi.

Papua Niugini man o meri i gat save long ranim tred stua, yumi nid long sapatim bilong helpim yumi Papua Niugini.

Nupela Masta's Program long UPNG



Hai Komisina bilong Australia i save stap long PNG, Bruce Davis, i tokaut long nupela masta's program long UPNG.



Seketeri bilong Dipatmen bilong Pesenel Menesmen, John Kali, na Bruce Davis.

YUNIVESITI bilong Papua Niugini (UPNG) i tokaut long nupela Masta's Program long Ikonmik na Pablik Polisi long las wik Fonde, Mas 16, 2017.

Nupela Masta's Program long UPNG bai strongim ol lida bilong bihain na kamapim hai kwaliti pablik polisi long senisim kantri.

Dispela program i bin kamap bikos long patnasip namel long Skul ov Bisnis na Pablik Polisi long UPNG na Australian Nesenel Yunivesiti we Pasifik Lidasip na Gavanens grup i sapatim.

Dispela grup em i patnasip namel long Papua Niugini na Australia Gavman, we i save redim edukesen na profesenel divelopmen long sapatim strongpela lidasip long pablik sekta.

Hai Komisina bilong Australia i save stap long Papua Niugini, Bruce Davis, i tok olsem skulim ol lida wantaim save long disiplin bilong ikonmik na pablik polisi em i bikpela samting bilong ol kantri long kamapim ol gutpela tingting na samting long bihain.

"Ol disisen long polisi we gavman i save mekim i save stiaim ikonmik na sosel divelopmen na i save givim sevis long ol pipel," Devis i tok.

"Yunivesiti bilong Papua Niugini em i namba wan yunivesiti bilong kantri i save go het na mekim sampela bikpela wok long kamapim ol lida bilong kantri.

"Masta long Ikonmik na Pablik Polisi bai bihainim dispela rot long kamapim ol man wantaim bikpela kwaliti, skil na stronpela lida we PNG i save laikim."

Skul ov Bisnis na Pablik Polisi wok yet long pinisim wanpela nupela 5-yia plen we bai strongim akademik na rises program i stap.

Nupela plen bai strongim hap bilong Skul olsem wanpela nupela skul bilong bisnis na pablik polisi long Asia- Pasifik rijon.

Nupela haus skul bilong Skul ov Bisnis na Pablik Polisi em ol i kamapim aninit long patnasip bilong Pasifik Lidasip na Gavanens grup.

Dispela skul haus bai redim wanpela nupela hap bilong ol sumatin na wok lain o staf long stadi.

CDC na helt patna i tok gutbai long WHO dokta



OI FET patna wantaim ol trena wantaim Dokta Pavlin i bin stap long wanpela gutbai kaikai long las wik.

Poto: US Embesi mida yunit.

YUNAITET Stet Senta bilong Disis Kontrol na Privensen (CDC) wantaim ol helt profesenel na ol pren long tok gutbai long wanpela dokta bilong Wol Helt Ogenaisesen (WHO), epidemiolojis, Dokta Boris Pavlin, husat i bin lusim kantri long Sarere las wik, Mas 18 long go bek long hetk-wata bilong WHO long Geneva, Swisalen.

Dokta Pavlin, i bin stap wantaim WHO Papua Niugini opis inap long 5-pela yia na em i

bin wok klostu wantiam Nesenel Diaptmen ov Helt (NDoH) na em i bin mekim bikipela wok long kirapim wanpela Fil Epidemioloji Trening (FET) bilong Papua Niugini. Nau FET i gat 45 fil epikemolojis o dokta.

WHO i sapotim dispela program wantaim Australia Dipatmen bilong Foren Afes na Treid

(DFAT), Hunter New England Health, na CDC.

“Ol wok bilong Dokta

Pavlin i helpim wok bilong CDC long strongim save bilong daunim na lukautim ol bikipela sik i save kamap long kantri, sekim ol hevi bilong ol sik, kamapim ol ripot bilong helpim ol disisen long kamap na long trenim moa heltke wokman na meri,” Kantri Dairekta bilong CDC, Steven Terrell-Perica.

Dokta Abel Yamba, CDC Stratejik Infomesen Edvaisa, i tok tenkyu long Dokta Pavlin long wok helpim bilong em long

kamapim strong save bilong ol FET trena na Dokta Sibauk Vivaldo Bieb, Eksekutiv Menesa bilong Pablik Helt na Berry Ropa, Menesa-Disis Seveilens na Rispos bilong NDoH, long visen bilong ol na lidasip long wok wantaim Dokta Pavlin long kirapim FET program.

FET program bilong Papua Niugini i kisim luksave long intenesenel mak long wanpela rijonal Fil Epidemioloji Konprens long Cambodia i no longtaim i go pinis.

Sikman kisim birua long rot bilong Dentel klinik

Veronica Hatutasi i raitim

LONG las wik, yangpela Michael Douglas, bilong Ginigolo Viles long Rigo, Sentrel Provins i wok long wokabout i go long Pot Mosbi Jenerel Haus sik Dentel Seksen long 3 klok moning taim ol raskol i bin holim em na, paitim na katim em wantaim naip long het, han na bodi bilong em.

Michael i save stap long 5 Mail na i wokabout i go long 3-Mail taim ol raskol i atekim em. Em i stori long *Wantok Niuspepa*.

“Long wik bipo, mi wok long go long dentel klinik, tasol mi leit bikos mi kamap bihain taim ol narapela siklain i kisim pinis ol namba inap loing 20 mak pinis.

“Olsem na mi bin laik kisim wanpela namba namel long 1 na 20, na ol dokta bilong tit i ken helpim mi long rausim tit na pen mi wok long kisim i ken pinis.

“Long dispela as, mi bin lusim haus long 5 Mail long 3.20 bikmoning na wokabout long Boroko i go olsem long 3 Mail. Mi kamap klostu long Peai Loj na wanpela liklik teksu kain kar i ran i kam na stop klostu long mi.

“Faivpela man i kamaut long kar wantaim tupela busnaip na ol i singaut long bek bilong mi. Mi les long givim bek bilong mi bikos em i gat ol setifiket, ol referens na ol arapela impoten pepa bilong mi, na fles draiv i gat ol wok bilong mi.

“Taim mi holim yet bek bilong mi, ol i stat



Michael Douglas em yangpela man we ol raskol i katim em wantaim naip taim em i wokabout long bik moning i go long dentel klinik bilong em i ken kisim namba hariap. Poto: Veronica Hatutasi.

long katim mi long het, bel, pinga na han wantaim busnaip. Mi bin lusim bek i go taim mi harim draiva i tokim ol long kilim na pinisim mi, em nau ol i kisim na hariap draiv i go.

“Bihain long dispela birua i kamap long mi, sampela lain i helpim mi na kisim mi i kam long Imejensi seksen bilong Pot Mosbi Jenerel Haus sik we ol i putim banis long het na han long stopim blut i ran.

Na bikos mi laik rausim tit we i wok long givim mi bikipela hevi, mi kamap namba 12 man long lain i wet long kisim namba na sanap long lain,” Michael i tok.

Michael i tok i bin gat ol sekyuriti gad klostu long hap we em i bin bungim birua, tasol ol i pret na ol i no wokim samitng long stopim ol raskol.

Ol manmeri i sanap

long lain i bin pilim sori long Michael na ol i bungim ol liklik koins o mani na givim em long helpim em long basfe long go bek long haus bihain long lukim dokta bilong tit.

“Mi pogivim asua bilong ol lain i kamapim birua long mi na tok tenkyu long bikman long sevim laip bilong mi,” Michael i tok.

Michael i laikim em moa polis long wokim fut patrol long ol strit, na tu, long i mas gat ol strit lait bikos planti hap insait long siti i tudak na i no seif.

Em i tok tu olsem dental klinik i mas inap long lukim moa long 20 sikman insait long wanpela de bikos samting olsem 60 manmeri na pikinini i gat sik long tit i save kamap long dentel klinik long Pot Mosbi Jenerel Haus sik insait long wanpela de na 20 tasol i save kisim sevis.

Madang Eben LLG i mas rausim graun toilet na putim septik



Tripela yangpela man digim pit toilet long Finsh rot long Madang taun. Poto: James G. Kila

James G. Kila i raitim

MADANG Eben lokal level gavman na provinsal gavman i mas traim helpim ol manmeri long sampela strit long Nu Taun na wokim ol septik toilet bilong ol na rausim ol graun toilet.

Planti ol haus long ol strit arere long taun stat long Miliok Strit i go olsem long Makatna Strit (Finsch Rot) na go olsem long Sisiak i gat ol pipel i wok long yusim yet graun o pit toilet. Dispela em bikos taun atoriti i no wokim septik toilet bilong ol.

Long sampela yia i go pinis long 1990s Madang gavman i bin putim mani long wokim ol septik toilet bilong ol lain long Madang taun. Wok i pinis tasol long sampela seksen bilong Miliok Strit na stat long dispela taim inap nau, no gat wok

divelopmen i kamap long skruim dispela wok. Ol manmeri long ol strit arere long taun i go het long yusim graun toilet.

I no long taim i go pinis, Wantok Niuspepa i bin bungim sampela yangpela man i digim bikipela hol na wokim haus bilong wanpela toilet long Finsch Rot em Makatna Strit.

Ol dispela yut i tokaut olsem planti lain i wok long yusim yet graun o pit toilet long bikos MULLG na ol

politikol lida bilong Madang i no putim mani long putim ol septik toilet.

Wanpela long ol dispela yangpela man, Nathan Saluk i tokaut olsem insait long olgeta foapela yia ol I save senisim ples long digim pit toilet insait long eria bilong ol.

“Ating olgeta kona bilong eria mipela stap long en em mipela wokim toilet pinis,”

“Taim toilet i pulap, mipela save digim narapela hol gen na wokim toilet. Dispela em wanpela hatpela wok tru bikos graun em strong na i gat ston na

mipela save kisim taim stret na ol skin bilong pinga save tekewe,” Nathan i tok.

Em i tokaut olsem Madang em planti lain i save apim nem na kolim olsem naispela Madang o BeautifulMadang, tasol dispela i no tru olgeta nau. Planti ol samting insait long Madang taun na ol ples i no stap stret long em kisim dispela nem yet.

“Ol lida bilong Madang i gutpela long toktok na pairap pairap tasol na ol i no save go daun tru na lukim wanem wari na hevi ol pipel long strit i gat,”

Ramu Niko em gutpela ples long kisim trening

RAMU Niko em wanpela main long Madang we i save sapotim ol papa graun. Wanpela long sapot em long givim skul na trening long ol pipel long opretim ol masin na kisim ekspirians long wan wan seksen.

Eva Lucy em bilong Bundi husat i gat 9 pela ekspirians long opretim bikpela masin. Stori bilong em inap long strongim ol arapela meri husat i drop aut long skul.

Eva em Papa graun bilong wanpela spesel maining graun ol i kolim SML8. Mama bilong em bilong Nokomboi na Papa bilong em bilong Imuruba klen husat i papa graun bilong KBK main tasol em i gat bikpela bilip long kisim wok na sapotim em yet.

Eva bin pinisim gret 10 long St Michael's Brahaman Sekenderi skul. Bihain em i kisim wok olsem haus meri wantaim Ramu Nico long Mas 17, 2009.

Bihain long dispela wok ekspirians, em i stat wok long wehaus long 2011 na bihain em wok olsem wanpela logistik opisa long yia 2013-2015. Bihain long dispela mi stat wok olsem asisten opreta bilong Chromite Separation Plant.



Eva Lucy i kisim save long ranim kain kain masin long wok ples bilong Ramu Niko main sait tasol. *Poto: Ramu NiCo midia yunit.*

“Mi namba tu meri long joinim Chromit Plant. Tasol ol i bin pinisim namba wan meri long wok na nau mi tasol wok wantaim ol ma,”
“Planti long ol dispela wan

wok man bilong ples Imuruba na Nokomboi klen na SML8 klen olsem na mipela save wok olsem brata susa tasol, Eva i tok.

Wanpela Gutpela samting long wok wantaim Chromite Plant em long kisim ekspirians long ranim kain kain masin.

“Mi save opretim masin olsem Spiral Classify, Convey belt, spiral shots, shaking table, distributor, chromite magnetic separator, crane (chromite remover), boil mill na ol arapela masin,”

“Ol Enjinia bilong Saina save skulim mipela gut tru long opretim masin na long putim sefti go pas. Maski ol saina ino save gut long tok pisin, mipela save mekim eksen long komyuniket,” Eva i tok.

Eva i tok em i lukluk nau long kisim gutpela wok pepa o refrens long Menesa bilong em bihain em i ken kisim save long ol bikpela skul na i ken kisim bikpela wok tu bikos em i yangpela yet na mas skul.

Eva i tok, ples laip long Bundi em hat tru long wei biong kisim mani. Olsem na em i givim bikpela tok tenkyu long Ramu Niko long givim wok na sapotim famili bilong em.

SAVE na MEKIM

Sapta 2

...moa yet long hap 1 (KON)

Kaikai bilong givim strong

KON (MAIS)

Tok i go pas

Kon em i wanpela gutpela kaikai tru

Em i save kamap hariap liklik. Yu ken kukim na kaikai taim em i nupela yet. Yu ken larim i go drai tu na bihain brukim na kukim. Em i gat planti liklik long dispela samting bilong helpim bodi i kamap bikpela, yumi save kolim protin.

Nupela lip bilong kon em i gutpela kaikai bilong pik na kau. i gat kon pinis long planti hap bilong Papua Niugin, olsem na ol manmeri bilong ples ol i save pinis long pasin bilong planim.

Tok bilong tupela kain kon

Kon bilong ples i save karim planti liklik. Sampela kon bilong didiman i save karim planti tru.

Sapos yu gat wanpela gutpela hap graun na yu brukim i go tupela hap na tupela hap i wankain sais, nay u planim kon bilong ples long hapsaitm na kon bilong didiman long hapsait. Orait, sapos kon bilong ples i karim nay u kisim olgeta kaikai bilong en na wanpela kopra bek i pulap. Na bilong didiman tu i karim na yu kisim olgeta kaikai bilong en, ating bai 4-pela kopra bek i ken pulap. Mak bilong graun i wankain, tasol kon bilong didiman i winim kon bilong ples. Olsem na askim didiman long gutpela kon.

Tasol was gut ol didiman tu i gat tupela kain kon. Narapela ol i kolim open polinet. Narapela ol i kolim haibrit.

Haibrit i olsem: Yu planim namba wan taim, bai em i kama gutpela tru. Bihain yu kisim pikinini bilong en na planim gen, bai em i no inap kamap gut. Olsem na sapos yu laik wok long haibrit kon, orait, oltaim yu mas baim nupela sits long ol didiman tasol.

Narapela ol i kolim open polinet. Dispela em i gutpela long yu kisim wanpela taim tasol long didiman, na bihain yu ken kisim pikinini bilong dispela kon gen na planim, olsem yu save mekim long kon bilong ples.

Meri Kisim trening bilong Palamen

VERONICA Weiang, husat i bin kisim trening bilong PNG Palamen prektis long wanpela wik i gat bikpela bilip long sanap long 2017 Ileksen.

Dispela trening em UNDP, Nesanel Palamen, na opis bilong Integriti ov Politikali Pati na kendidet i ranim.

Weiang bin wanpela bilong ol 50 meri husat Yunaitet Nesen I bin makim ol taim i aplai long kisim dispela trening. Dispela trening i karamapim ol bikpela toktok olsem; Ol Wei bilong ranim palamen, Stail bilong gavman, Politikali dibet na Polisi disien.

Weiang i tok dispela trening



Weiang kisim Setifiket long deputi Spika bilong Palamen, Hon. John Simon.

i gutpela wei long bung wantaim ol arapela lida meri bilong PNG. Em i tok tu olsem em i no wari sapos em i lus o win, bikpela samting em olsem dispela ranisip namel long em na ol arapela lida meri i ken kamapim gutpela tingting na

kamap maus bilong olgeta meri insait long PNG.

Weiang i bin oposisen lida long taim bilong mok sesen bilong palamen na em i bin go pas long tim bilong em long toktok. Long taim bilong kwesten na ansa, Weiang i tok-

tok long hevi bilong marasin insait long kantri na Manus Refuji kemp.

Weiang i gat pepa long Lo na gat ekspirians long praivat sekta tu na bai sanap long Not Waghi open ilektoret long Jiwaka provins.





Yut, Meri na Famili

Pastor
Barbara Lunge

Ol kalabus lain i go bek long wokim Tempel (haus lotu)

CYRUS, King bilong Persia i tok: 'Bikpela God bilong Heven i givim mi olgeta kingdom bilong graun na em i makim mi long wokim wanpela haus lotu long Jerusalem long Judah.

Sapos i gat ol pipel bilong em i stap namel long yupela, God bilong em i ken stap wantaim em na larim em i go antap long Jerusalem long Judea na wokim haus lotu bilong BIKPELA, na God bilong Israel. Na ol pipel bilong olgeta hap we ol lain i no dai na i stap long en i mas givim ol silva na gol, wantaim ol enimal, na ol ofa long laik bilong ol yet i go long haus lotu bilong God long Jerusalem.

Bihain ol het bilong famili bilong Judah na Benjamin, na ol pris na ol lain Levi, olgeta husat bel bilong ol i kirap long God, i redi long go na wokim haus bilong Bikpela long Jerusalem". Ezra 1: 2-5. Lain 7 i tok, Moa yet long dispela, King Cyrus bringim ol samting bilong haus lotu bilong BIKPELA, we Nebuchadnezzar i bin rausim long Jerusalem na i putim long haus lotu bilong God bilong em.

Dispela tok bilong profet em bilong wokim haus lotu long Jerusalem na tu long wokim haus lotu bilong spirit insait long lewa bilong ol Kristen.

Mining bilong nem haus lotu em: wanpela ples we God i save stap. 'Yu no save olsem yu yet em haus lotu bilong God Spirit bilong God i stap insait long yu. 1 Korin 3:16

Long wokim gen em i olsem ol bai kukim olpela banis bilong haus long han bilong birua na yu mas kirapim laip bilong yu bek gen long pastaim glori olsem em i bin stap pastaim na God bai amamas long yu.

Propet Jeremaia i tok aut pinis bipo olsem ol Juda lain bai i stap yet long graun bilong Babilonia inap 70 yia pastaim long ol i go bek long Judah. Jeremaia. 29:10, 25:11-12.

I gat senis nau i wok long kamap long taim God i makim long mekim ol wok bilong en. Insait long spirit, BIKPELA God long heven i wok long toktok long hat o lewa bilong king bilong Babilonia em ol lida bilong ol wol long helpim long skruim wok bilong God long kirapim gen haus lotu long Jerusalem long kamap long mak bilong pastaim glori bilong em.

Yumi ol Kristen bilong ol haiden kantri i mas baim sea bilong God long bringim ol Isarael i go bek long asples bilong ol wantaim silva na gol olsem buk bilong Ezra i tok long Ezra 1:2-7. Long Buk Stat 12:1-3 em i tok olsem ol lain husat i blesim Abraham na ol lain husat i sit bilong Abraham em bai God i blesim ol.

I gat tupela bikpela mining bilong nem yumi mas luksave, em Judah na Benjamin. Judah i minim preis na Benjamin i minim, man God i laikim tumas na husat i stap namel long solda bilong em. Mi lukim mining bilong dispela olsem em ol hap lain bilong en i stap wantaim preis na wosip o lotu wantaim amamas long mekim wok bilong em long kirapim gen haus lotu na ol mani i mas kam isi tasol.

Plis yu mas luksave long ol dispela banis em yu mas mekim i dai ol mi-pasin bilong yu yet na kam laip wantaim Krai. Yumi mas kirapim gen spirit laip bilong yumi pastaim long Jisas i kam bek long kisim yu go. Yu mas kaikai gut kaikai bilong spirit tripela taim long de long yu bai stap laip na mekim wok bilong skruim Kingdom bilong God i go.

Sios laik strongim wok poroman wantaim gavman

OL sios long Papua Niugini i tok long wok bung wantaim gavman long kamapim developmen long kantri.

Wantaim dispela ol i laik lukim olgeta man na meri i kisim wankain luksave long taim bilong kisim wok.

Sevenpela bikpela sios long kantri i mekim dispela tok long taim ol i bung long Alotau, Milen Be long dispela wik wantaim ol Non Gavman Grup (NGO) bilong Australia na ol mausman bilong gavman bilong Papua Niugini na Australia. Ol i bung long toktok long 2017 Sios Patnasip Program (CPP) forum.

Long taim forum i endosim ol plen bilong CPP we bai surukim lukluk bilong em long givim sevis i go long ol manmeri long ol narapela hap long wankain taim em bai wok long hap em i stap inap wok i pinis.

Long dispela Katolik Bisop Konferens Jeneral Seketari Pater Victor Roche i tok ol sios i bung gut moa long ol i bin save mekim bipo long bringim ol kain sevis long helt na edukesen long ol rurel ples long Papua Niugini na strongim sindaun bilong ol meri na pikinini na ol lain husat hap bodi bilong ol i bagarap.

"Olgeta manmeri long Papua Niugini i save long wok ol sios i mekim long developim



Ol sios lida na Australia Hai Komisen opisa i stap long bung bilong Sios Patnasip Program long Alotau, Milen Be. Poto: Australia Hai Komisen

ol rurel ples long kantri," Pater Roche i tok.

"Mipela i laik wok wantaim Gavman na dispela i mas kisim tu ol disisen e mi save mekim, moa long ol bikpela tok gavman i save kamapim wantaim lo.

Tupela namba wan hap bilong CPP em long toktok bilong bringim sevis olsem helt na edukesen i go long ol rurel ples na strongim ol arapela samting olsem ol namba bilong ol wok manmeri na namba bilong ol haus na klasrum i stap.

Ol i tok wok bilong helt na edukesen bai go het yet we namba tri hap bilong wok poroman bai lukluk long jenda

ekuiti, sosel ekuiti, sosel inklusen, disasta ridaksen na bringim bel isi na prosperiti long ol hap we i gat hevi.

Ol sios lida Kaunsil Siaman na Yunaitet Sios bilong Papua Niugini Modereta Reverem Bernard Sia i tok narapela hap bai lukim wok poroman bai lukuk na kisim moa tok bilong wok developmen bilong kantri.

"Bikpela salens bilong mipela em long save long rot bilong bringim sevis i go long ol rurel ples," Rev. Bernard Sia i tok.

"Mipela i laikim olgeta manmeri, mipela i no laikim wanpela grup tasol."

Em i tok ol sios i laikim tru

long CPP i wok strong i go moa yet inap long taim em i kamap long mak we no gat moa samting bilong em long mekim.

CPP i bin kamap long 2004 aninit long Australia Gavman developmen patnasip wantaim Papua Niugini, we i givim luksave long ol sios i bringim i go long ol manmeri long rurel ples.

Australia Hai Komisin Kaunsila Brendan Peace i soim rispek bilong em long ol sios long wok ol i save mekim long developim Papua Niugini.

"Gavman bilong Australia i sapotim yet dispela wok poroman wantaim gavman bilong Papua Niugini na ol wok developmen ol sios i save kamapim," em i tok.

Yunaitet helt sevis wok bung wantaim Enga Provinsal helt

NSAIT long 40 yia Kandep eria i no gat gutpela gavman sevis tasol Yunaitet Sios helt sevis i bin luksave long dispela nid na bildim wanpela klinik long Waigifa Viles. Wanpela Pasta bilong Samarai long Milen bei Provins i lukautim dispela klinik.

Miseneri Jimmy Kenny save autim Tok bilong God long ol pipel em save givim marasin i go long ol manmeri husat i gat sik long bodi. Em i wok olsem wanpela pasta na Komyuniti Helt woka long ples insait long bikbus Marung and Lauguni klinik.

Ol pipel i kisim taim inap olsem na Sios helt sevis i mas kam insait long helpim. Gavman na Provinsal helt dipatmen tu mas putim han long helpim ol manmeri husat i laikim helpim..

Yunaitet Sios i stap long Pogera olsem na i luksave long

nid bilong ol bikos haus sik bilong gavman i pas long wanem bin gat planti ples pait i kamap. Wanpela haus sik em Munglep we bin pas 26 yia na nau klinik i op we tupela CHW lukautim stap.

Yunaitet Sios i gat tingting tu long bringim helt sevis i go insait long ples Paiyala na Mt Kare olsem na ol i bin sainim Memoremom ov Agrimen (MOU) namel long Sios, Provinsal Helt, Barrick na PDA kampani.

Sif Eksekutiv Opisa (CEO) bilong Enga helt Atoriti Aron Luai na bod bilong em i sanp wantaim Roman Pembu husat em Yunaitet Sios Helt na HIV sekreteri long givim aut dispela tingting long Gavman..

Nesenl Dipatmen bilong Helt bai sainim MOU na bihain, Provisal Helt Bod bilong Wabag bai sainim MOU na wok ken go het.

Ol Lutheran sumatin bai go long Ista Kem

Joyce Huanjo i raitim

MOA long 5,000 Lutheran sumatin bai kamap long Gabmazung Lutheran Praimeri Skul long Lae long wanpela enual Nesenel sumatin Ista Baibel kem.

Gabmatzung Lutheran Praimeri Skul i brukim rekot namba wan taim tru long go pas long ol sekenderi skul husat i save holim dispela bung.

Ol i bin kisim tok orait long holim 2017 Ista kem bihain long 2016 Ista kem long Kitiip Lutheran Sekenderi Skul insait long Westen Hailans Provins. Ista kem bai stat long de 12 i go long 16 de bilong mun Epril. Kem fi bilong wan wan sumatin em K25.

Gabmazung Lutheran Praimeri Skul i stap aninit long Lae Wampar Seket bilong Yabim Distrik.

ELCPNG Ivens Kodineta Roy Miringke i tokaut olsem ol pipel insait long Gamazung na Gamsongkec ples i wok bung

gut tru wantaim skul long redi long Ista kem i mas go het.

Mista Miringke i singaut i go long ol Lutheran skul insait long Lae siti long soim sapot bilong ol long wanem em i namba wan taim tru long wanpela Praimeri skul i go pas long kem.

Dairekta bilong ol Seplin bilong Evanjelisim Dipatmen bilong ELCPNG Reveren Jimmy Joe i tokaut olsem Het Tok bilong Ista Kem em, Liberated by God's Grace, o Long Marimari bilong God yumi kamap fri.

Reveren Joe i tok bai i gat tripela liklik het tok aninit long bikpela het tok olsem: 1. Salvesen i no bilong salim long mani; 2. Manmeri i no bilong salim; 3. Samting God i wokim kamap i no bilong salim.

Em i tok moa yet olsem aninit long dispela tripela liklik het tok, ol bai brukim ol sumatin i go long tripela grup em, praimeri, sekenderi, na koles o yunivesiti.

I mas gat gutpela luksave long egrikalsa risets

EGRIKALSA em i baksait bung bilong PNG. Sapos yumi no planim ol kaikai na ol bisnis diwai, bai yumi stap olsem ol tarangu bikos olgeta mani bai i go long baim ol kaikai bilong stua.

Ol tumbuna bilong yumi i manmeri bilong wok gaden na planim ol kaikai. Tasol tude laip i senis. Planti bilong yumi i no save long pasin bilong wok gaden, o yumi les tumas long tuhat long katim bus, digim graun, planim kaikai na rausim ol gras nogut long taim ol kaikai i wok long gro.

Wankain tu long ol bisnis diwai olsem kopi na kakao.

Gavman i luksave olsem ol pipel i nidim helpim bilong ol saveman na meri bilong wok egrikalsa long groim ol gutpela kaikai long graun bilong ol.

Olsem na em i kirapim kain ples olsem Nesanel Egrikalsa Risets Institut, NARI ausait long Lae na Laloki Didiman stesin ausait long Pot Mosbi.

Ol saveman na meri bilong wok egrikalsa i mekim bikpela wok long testim ol kaikai long kain kain graun long painimaut wanem kain kaikai bai i gro gut.

Tude i gat bikpela program bilong traimekim PNG i kamap indipenden long planim na salim rais insait long kantri yet na salim i go long ol ovasis kantri tu.

I gat risets i wok long kamap nau long NARI long winim dispela



driman bilong nesanel gavman.

Tasol NARI i nidim sapot mani tu long mekim ol ol risets.

Oltaim ol i save kisim mani i kam long ol ovasis gavman na ol dona ejensi long mekim risets wok.

Nesanel gavman tu i mas givim gut mani bilong helpim ol i mekim ol risets wok.

Bikpela mani bilong baset i save go long baim ol wokman na ol wok bilong edministresen na i no gat inap long mekim ol arapela kain wok olsem risets.

PNG i gat planti ol gutpela saintis i mekim bikpela wok long egrikalsa risets. Dispela wok ol i mekim em i bilong helipm sindaun na laip bilong ol pipel bilong

kantri.

Las wik gavman bilong Australia i bin opim rais mil teknoloji long NARI.

Ol i bin mani long mekim risets bilong kamapim dispela kain masin bilong helpim ol rais fama bilong kantri.

Em i mak bilong gutpela wok poroman namel long PNG na Aus-

tralia long developim egrikalsa long kantri.

I gat ol narapela wok tu Australia na ol arapela kantri i bin helpim long kamapim. Tasol bikpela hap wok bilong givim mani long risets i mas kam long gavman bilong yumi yet.

I mas gat luksave olsem long risets wok bilong egrikalsa na mani i go long sapotim dispela wok.

PNG i stap yet long mak bilong groim o kaikai bilong lukautim liklik namba bilong ol pipel tasol. I no gat bikpela komesel egrikalsa bisnis yet.

I gat wan wan i stap tasol dispela aidia i no kamap strong tumas. Ating sapos i gat gutpela risets na helpim bai ol pipel i tingting long traimekim dispela kain bisnis.

I gat planti bilong graun i stap nating we pipel i ken yusim long egrikalsa bisnis.

Pasin bilong luksave tu long bikpela wok bilong risets em i wanpela rot bilong kirapim tingting bilong ol saintis bilong yumi long strongim wok bilong ol.

Olgeta yia long taim bilong givim ol awot, yumi save lukim ol bisnisan na ol politisen na pablik sevan i kisim medal.

Tasol olsem wanem long ol savemaneri husat i save wokim risets bilong helpim lain bilong ol pipel. Mobeta yumi luksave long ol tu.

Pasin korapsen bagarapim yet PNG

BIHAIN long 41 yia Papua Niugini i bagarap yet long les, paul na stil pasin yet.

Dispela i no ol tumbuna pasin bilong kantri na i bin stat liklik tasol nau i go bikpela na i kisim klostu olgeta hap bilong sosaiti.

Transparensi Intanesenel korapsen ripot bilong 2015 i soim PNG i stap 139 long 168 kantri. Long 2014 em i stap 145 long 174 kantri.

Long dispela siaman bilong TIPNG Lawrence Stephens i tok 2015 PNG i skorim 25 poin aut long 100 poin.

Na stat long 2012 em i wok long skorim wankain poin tasol.

Dispela i soim tu olsem pasin korapsen i no lusim kantri na i wok long daunim yet PNG.

Bipo long waitman lo i kam manmeri i stil i min



em i mas dai o kisim bikpela mekimsave.

Moa yet taim wanpela i stil dispela em bikpela sem long em yet na famili bilong em.

Long dispela taim sapos wanpela man i stil, sapos lo i kisim em, ol i kisim mekim save. No gat ol i amamas na go het yet long mekim pasin nogut bilong ol.

Long nau tu lukluk i stap olsem samting bilong yu i no moa samting bilong yu tasol, no gat em samting bilong olgeta manmeri.

Las yia yumi i amamasim 41 krismas bilong yumi olsem kantri na dispela yia

yumi bai amamasim 42 yia bilong yumi.

Em i gutpela, tasol askim em olsem, manmeri i gat wanem samting i stap bai ol i amamas?

God Papa i blesim Papua Niugini long planti gutpela samting, na ol save manmeri bilong mipela yet na bilong ol narapela kantri i save tok Papua Niugini i paradais.

Ating Papua Niugini i kain paradais ples olsem taim ol save manmeri i tok Papua Niugini i winim planti arapela kantri long graun long em i gat olgeta samting long bus, graun, wara, kaikai, aninit long graun na klinpela win.

Tasol sori olsem sindaun bilong ol manmeri yet i no gutpela.

Bihain long 41 yia maski gavman i kamapim ol

bikpela mani plen tasol no gat gutpela mak i soim dispela ol plen. I luk olsem ol dispela plen i tok win tasol.

Mipela i gat ol rot i bagarap yet we long taim bilong Australia, dispela ol rot em ol kar i save ron i go kam gut tasol nau gras na bus i karamapim na ol kar i no inap ron gen.

Long Mosbi yet sapos yu i lusim ol bikpela haiwe rot na draiv long ol han rot, yu bai bungim ol bikpela hol na tais i stap long ol kar i hat long ran.

Wantaim dispela ol haus sik i baragap na brukdaun yet, klasrum bilong ol skul i bagarap o no gat klasrum long skul pikinini i sindaun na lain gut, ol sik we i mas pinis i kamap gen, wok didiman i no kamap strong, manmeri i no wok bisnis na no gat mani long poket bilong ol.

Gras i karamapim Bogia gavman stesin



Sacred Heart Tabe praimer skul long Potsdam kea senta.

Ol Foto: JAMES G. KILA

James G. Kila i raitim

PLANTI lain husat i bin stap pas-taim long Bogia gavman stesin long 1970s na 1980s bai tokaut olsem em wanpela naispela na klinpela ples tru.

Gavman stesin i stap arere long naispela waitpela wesana nambis na naispela kol win save givim gut-pela kolwin na filings save go nais tumas.

Tude sapos yu olupela man omeri i go bek na lukim Bogia gavman stesin bai yu sori tru. Gras i gro karamapim ples na no gat gut-pela wok i kamap long stretim ples. Ol bikpela diwai i gro na pasim gutpela ples bilong lukluk i go daun long solwara na kisim gut-pela kolwin. Ples i stap sori.

Ol haus bilong gavman na ol biding i go olupela na bruk bruk nabaut bikos no gat mentenens.

Planti lain i tokaut olsem ol gavman sevis long Bogia i pundaun pinis bikos no gat luksave i kam long nesanel memba bilong Bogia long Palamen.

Bogia stesin stap long bus na tudak

Long Mande Mas 13, mi wantaim ol wanwok i bin wok raun i go long Bogia. Mipela lusim Madang long samting olsem 3 klok apinun na ran i go kamap long hap samting olsem 7 klok nait. Planti seksen bilong rot namel stat long Kumil bris namel long Bogia na Sumkar distrik i bagarap stret bikos no gat mentenens long rot.



“No gat pawa saplai go long Bogia helt senta na ol helt wokman save yusim lait bilong mobail fon long sevim ol sikman meri na pikinini”.

Wanpela ples long malolo bilong ol turis long Bogia em Anua Negu Gest Haus.

Taim mipela i go abrusim Holi Spirit Sekenderi Skul na go insait long Bogia stesin, mipela lukim wanpela stua bilong ol bisnis lain bilong Saina tasol em lait i stap. Dispela stua tasol wantaim arapela bilong wanpela praimer skul tisa bipo husat i statim printing stua bilong em i gat lait. Olgeta arapela haus em tudak na liklik batri bilong ol tos lam tasol i lait.

Long 1980s Bogia gavman stesin i save yusim disel jenereta na givim pawa i go long haus bilong ol

pablik sevan na ol gavman opis na helt senta. Tude dispela i no moa stap. Bikpela gras na bus i pulap insait long stesin.

Ripot mipela i kisim long moning i soim olsem planti ol komyuniti helt woka (CHW) long Bogia i lusim na go aut pinis bikos long ol hevi bilong lo na oda.

Taim mipela i lukim Bogia helt senta i stap long tudak, mipela askim sapos i gat ol sikman meri na pikinini i stap, na ol lain i tok “yes”. Ol i tokaut olsem long Bogia helt



Tupela wokman bilong Hailans rijon, Robert Sine bilong CEPA na Nick Waipuk bilong MRA sanap long nambis long Mambuan viles na lukluk go Manam Ailan.

sent, planti taim imejensi ol dokta i save yusim mobail fon lait long mekim wok. No gat pawa saplai i go long helt senta na ol wokman meri i save sakrifais tru long sevim ol manmeri long dispela helt senta.

Bogia Distrik Helt Menesa, Ruth Wasami i tokaut long midia tu olsem lo na oda hevi i mekim ol helt wokman i les long stap long Bogia stesin.

Planti lain i tok pasin bilong hombru na mariwana i kontrolim ol yangpela man na ol save mekim kain kain ol bikhet pasin na pretim ol gutpela manmeri.

Narapela samting tu we i kamapim lo na oda hevi em pasin bilong wokim ol 24-aua maket long rot. Dispela ol maket i save pulim kain kain lain long hap. Dispela ol nait maket save sevim ol lain husat i go baim buai long Ramu na ol as ples long Bogia long bringim i go long Hailans rijon.

Dispela ol maket tu save lukim

tred bilong mariwana na ‘Yawa’ o hombru we nau em as tru bilong bikhet pasin namel long ol yut.

Pasim taim long Anua Negu Gest Haus

Mipela i bin go long Anua Negu Gest Haus we i stap arere long stesin na i serim boda wantaim lokal Mambuan viles.

Mipela ran go long geit na askim sapos Distrik Edministreta bilong Bogia i mekim buking bilong mipela long slip long dispela nait. Taim mipela askim olsem, menesa bilong gest haus, Charles i askim mipela gen: “Husat em Distrik Edministreta bilong Bogia?”

Wanwok bilong mi Ivan Mullul i kolim nem bilong man ol i tok Distrik Edministreta, na Charles i bekim tok olsem “Sori tru, mipela ol pipel bilong Bogia i paul yet, husat stret em trupela distrik edministreta bilong Bogia.

Ol lain asples lain bilong Bogia long Mambuan viles i tokim mipela olsem politiks i bagarapim Bogia.



Kaunsila Pangami bilong Poika traib i tok tenkyu long Gabriel makim maus bilong olgeta papamama.

MY Media & News Agency

GABRIEL Andandi wanpela bisnisman long Lowa Kagul distrik, Westen Hailans Provins luksave olsem edukesen tasol i ken senisim Tambul/Neblyer ilektoret na kantri.

Gabriel i bin wok wantaim Yunaited Nesen (UN). Moa long 15 krismas, Gabriel lusim UN na kamap bisnisman na helpim ol lain long ples. Bipo em i wanpela tisa na i kisim mastas digri long Australia.

Long 1997, Gabriel i bin helpim ol sumatin long skul fi na moa long 700 sumatin em i bin helpim pinis nau i kisim wok long ol bikpela wok insait long kantri.

Gabriel i luksave olsem Tambul-Neblyer elektrot em no gat risos na em i gat bel sori long helpim ol papamama husat laikim ol pikinini bilong ol i go long bikpela skul.

Taim Gabriel i luksave olsem helpim bilong em i senisim planti pikinini long las 20 krismas, em i bin skruim wok helpim i go bikpela na long Sande Februari 19, 2017 em i lon-sim "Tambul-Neblyer Students School Fee Initiative".

"Mi bin helpim moa long 700 sumatin stat long 1997 na tude ol i holim ol bikpela wok olsem dokta, loya, akaunten, na ol narapela wok.

"Dispela yia mi laik helpim 500 moa sumatin. Mi bin basetim hap milion Kina (K0.5mil) long baim skul fi bilong ol," Mista Andandi i tok.

Long stat bilong dispela yia, Mista Andandi i bin mekim ol ran i go long olgeta bikpela skul insait long kantri na baim skul fi bilong ol Tambul-Neblyer sumatin.

Em i bin bungim moa long 60 sumatin bilong Tambul-Neblyer long Madang long ol we em i baim moa long

K50,000.

Long Februari, em i bungim 60 sumatin long Goroka na baim moa long K50,000 skulfi bilong ol.

Moa long 150 Tambul-Neblyer sumatin long Lae em Gabriel i bungim long Balop Tisa koles na baim moa long K90,000 fi.

Long Mas 19, Gabriel i bungim moa long 20-pela sumatin long Kokopo na baim moa long K20,000. Nau em bai go long Kaindi long Wewak, Simbu na pinis long Maun Hagen na baim skul fi bilong ol sumatin.

Gabriel i helpim tu ol sumatin long UPNG na narapela skul insait long Pot Mosbi, Manila, Philippines na China.

Long Mas 4, em i bin go long Manila na bungim moa long 15 sumatin bilong Tambul-Neblyer na ol narapela distrik na baim moa long K20,000 fi.

"Greg Ranji em bilong Apa Mendi na skul long Manila tasol em i bilong PNG na mi hamamas long helpim," Mista Andandi i tok.

"Philomina Philipo em bilong lalibu long SHP na skul long China tasol mi bin helpim em bipo yet. Mi laik kamapim human risos bilong PNG na Tambul-Neblyer wantaim," Mista Andandi i tok.

Moses Pangimi, kaunsila na lidaman bilong Poika Traib insait long Westen Hailans provins i tok bikpela tenkyu i go long Gabriel Andandi long sapatim ol sumatin we i save painim hat stret long baim skul fi bilong ol.

"Mi makim maus bilong olgeta papamama bilong ol sumatin na tok bikpela tenkyu long God i givim yu dispela wisdom long helpim ol pikinini bilong mipela. Dispela kain lidasip bilong yu em mipela nidim long Tambul-Neblyer," Kansola

Pangimi i tok.

President bilong Tambul-Neblyer sumatin long Goroka Univesiti, Johnny Kaile i tok moa long 60 sumatin i amamas stret long bikpela helpim Gabriel Andandi i mekim long baim skul fi bilong ol.

"Ol papamama bilong mipela i no wok mani na hat stret long kisim mani tasol dispela bel na helpim Gabriel i givim em mipela painim hat stret long tok tenkyu. God bai blesim em,"

"Nogat wanpela man i ken mekim olsem long mipela. Planti ol narapela sumatin em ol memba bilong ol i save baim skul fi na mipela Tambul-Neblyer em nogat stret inap Gabriel i helpim mipela stat long 1997," Johnny i tok

"Mi lukluk long ai bilong ol dispela yangpela sumatin na askim mi yet; 'wanem samt-ing stret i ken stopim ol dispela sumatin long kisim gutpela edukesin? Long pes bilong ol na lewa bilong ol em mi lukim ol i gat bikpela diriman long kamap gutpela sitijin long kantri. Na mi gat bel isi long helpim ol," Mista

Andandi i tok.

"Buk Baibel i tok yumi mas laikim narapla man na meri. Mama lo bilong PNG i tok olgeta manmeri i mas kamap wankain na pasin rispekt na luksave i mas stap. helpim bilong me em i sanap antap long dispela ol as tingting long lukim ol yangpla bilong tete i mas gat gutpela laip tumoro," Andandi i tok.

Trupela lida kamapim moa save manmeri bilong Tambul-Neblyer



Yunivesiti bilong Goroka sumatin i tok Gabriel Andandi em i gat klia visin long helpim ol sumatin bilong Tambul-Neblyer



Mista. Andandi i givim fom long ol Tambul-Neblyer sumatin long Lae lo filim na toksave hamas mani ol bai nidim long skul fi.

TORO



BIABIA



KANAGE



Ol Yunit long Rainbow i stap long Rent!

I gat haus bilong rent i stap long Rainbow Estate

Seksen 506, Lot 60 na 61 – Word Publishing Kampani Kompaun.

Long Rainbow Estate nau i gat 5-pela tripela betrum haus i stap fri long rentim. I gat bikipela banis na sekyuriti geit na lait i stap.

Prais bilong rentim em K4,000 tasol long mun.

Planti mango diwai, plawa na planti gutpela klinpela win.

Plis ringim Buana Ragela o Elizabeth Konga long telepon namba 325 2500 long toksave.



Poems

Sweet Contemplation

By: Niko Numana

.....STILL DARK.....
 Not a soul is insight
 Only the sweet sound of the early birds on
 my ears
 The fresh smell of dew drops on the leaves
 The musical sound of roosters crowing
 Marking the dawning of another day
BUT ALREADY.....
 I am awake
 An this is but my best hour
 Alone, to sought my thoughts out
 To Contemplate
 Of the happenings of the oncoming day
 Sometimes my thoughts wander
 To the past and future events
BUT THEN.....
 The cries of the little baby
 Bring me to the realization
 That my daily chores must now begin
 A mother, a housewife I must be
 But oh! How sweet it is
 These first few hours
 To be alone in thoughts and deeds.

Home Calling

By: Niko Numana

Them big vessels I've travelled in
 Sailed the seven seas aboard them
 To lands beyond the sunrise

The high fast flying silver bird
 Jumbo jet it is called
 Has taken me to place and people
 Undreamed of been in and meeting
 In my entire life span

Those huge skyscrapers
 I've seen them
 Been in them
 Lived in them

A high life I've lived to the fullest
 The joys and pleasures of life
 Are mine at my fingertips
BUT YET.....
STILL YET.....

The yearning is there
Like what a mother is to a child

The Longing to be back home
 The home of my birth
 Where once I walked the surrounds un-
 bounded
 Feeling the soft smooth earth
 Barefooted, cracking twigs under my feet
 Absorbing various sweet scented odours of
 the natural wilderness
 Listening to the cheerful chips, calls and
 cries of the many song birds
 The urge so strong beyond control
 For once has overpowered me

So packed my bags and leave must I
 In the big Silver bird
 Back to my much love Island Home
 Where my long forgotten kinsfolk await
 me.
 And welcome me wholeheartedly
 Home to stay and home to bed
 In my bamboo walled sago thatched roof
 house
 Where I slumber undisturbed
 And dream of the Simplicities of village life.

STORI BILONG TUMBUNA

WATPO DOK SMELIM TEL BILONG DOK

Long wanpela bikpela bus tru long ples ol man i no save wokabaut planti, ol kain kain dok save i kam bung. Dispela bikpela bus em ples bilong ol. Ol i bin gat wan wan haus we ol wan wan famili yet i save sindaun. Taim ol dok i gat bikpela miting o taim ol i holim pati samting, ol i save bung long haus bilong wanpela famili. Tu ol i gat wanpela pilai graun we ol i save pilai soka, volibal, basket bal na ol arapela kain pilai.

skelim ol yet gut na ol i stat long pilai. Long wanpela sait i gat handet ol dok. Em ol strongpela dok man na dok meri wantaim.

Ol i gat 5-pela goli o gol kipa. Long arapela hap tu ol i gat wankain namba long ol strongpela lain. Ol i no gat wanpela rul o lo. Ol i save givim tasol long lek na tu ol i save surukim bal wantaim nus bilong ol. Bal i no bikpela tumas. Ol i save pilai long ol pikinini bilong ol diwai.

Nau ol i wok long taitim bun na givim givim moa moa yet. Tasol sampela dok i no amamas. Taim ol i pilai ol sampela i save holim ol arapela long tel bilong ol. Na taim wanpela i sakim lek bilong narapela olsem ten o twenti i save pundaun kranki long hapsait.

Olsem na olgeta i stapim pilai na ol i tok orait long rausim o pulim tel bilong ol na hangamapim long banis

arere long soka graun. Taim olgeta i hangamapim tel bilong ol long dispela banis, ol i go pilai gen. Tarangu ol i no pilai pilai long dispela san. Sampela i bagarap tru tasol ol i wok long hatim skin yet.

Namel long pilai wanpela dok i lukluk i go bek long tel bilong ol, em ol i bin hangamapim long banis. Em i ting tel bilong ol i stap gut ya nogat, em i lukim wanpela pik i wok long brukim graun arere long banis na taim pik ya muvim ol banis, olgeta tel i pundaun.

Tarangu ol dispela strongpela lain bilong pilai i givim kranki stret long painim tel bilong ol yet. Tasol sori tumas. Dispela pik i bin miksim olgeta tel na, ol dok ya i no inap long painim tel bilong ol wan wan stret. Ol dok ya i no manki, ol draipela lain stret. Olsem na wanem tel ol wan wan i kisim ol putim o werim tasol.




Nau yumi ken lukim. Taim wanpela dok i lukim ol arapela dok em bai ran i go hariap tasol na smelim tel bilong ol. Dispela em wok long painimaut tel bilong em yet stret em i bin lusim taim em i bin pilai soka. Yumi save lukim olgeta wan wan dok i wok long painim tel bilong ol stret. Em wok bilong olgeta dok taim ol i lukim ol arapela dok.

long em, yumi save em bai sapos dispela dok i paini-

maut olsem narapela dok i putim tel bilong em, yumi save lukim ol i save pait.

Em nau! Ol pikinini i ken painim rot i go long ples wantaim Wantok lain...



Yu pinis! Em ples bilong yu

Ansa bilong Wod Pilai isu 2217

R N H Z G T S N X P S N M R V L I O I S E U L O M
L C A O E A T V I I E O A G R U R K S D U S P S E
N E T F Q Y K D Y E V W U N I C R L M N H M F J M
H I S Y N F U S O O O V G D P D E A L O R P I O R
S C O E A P S M K O H Z M W F E Y P A C A K R G S
N F I E N K K A K O T R J Q S G M R S E N V C I X
R G M I K A U J Y W I S E O T N A P I T T B E T
S S Z S D Z S B W S V I C L S W O L L Y O R E X O
C F E E F A K R H E E E M R V E D J V O W C L N E
Y R N M R K I E M N F D R R P R I N T I M B O W
T I S A L A E G I B J T O I K F D A A T P P Z E T
C S H J N Q C F O G L X W L A E R R R U I G R S A
Q I O N S E W O O K R U M Y E A T U A S N A N T O
R A A R M L R J I D K U O M B V R K P L I W E E D
F H R Y D A E Q S I T M W M R R A L E H S B E R K
E U E E N R I N A G E L A O C M P I L A T A D E G
R S W H E E C A A I O T W L A Z P R A I A K N T H
A B I I V M F I L C R A A Y E E E M S T I S E A N
P I D E W D R F M H H F N Q M O A O E A M I L R T
Z W S C M O H E C L T W M E D P G G M E K P A S R

PAINIM WOD PILAI

- Ol wod lista:
PENDA
ATUN
SISTER
BAMIM
HIA (2)
TING
NIL (2)
DISPELA
PANGAL
VAR
REDIO
PAR
FRI
HALO
HON
GEN
KANDAIM
LAUP
KALA
MALOLO
NOT

V X A X Z G K T H A Y B H M W J K E I R E W Z E T
W B G E N C N A A T I I O A X G A E N R I E A R I
O A W I S K M A L O L O S D D X I I S D R O F L B
B A T E N A I G O A A A B L G E I N I F C H L T E
S B S U L N H T A L U N A E A U D L E W Y D D C H
T L S T N D B E I E P G M H T S A K E A S Z G V Z
N H I I T A I N C E N Y I E A G A I W I D K N I O
R A S I C I S S H A A P M O X Y P E V A J I R W S
S O T D A M F Z P B O V B O T A O I L V E G D M T
C E E I P I M G A E Q F E H R O M E L G T B X A R
V A R A E R A G R H L G P E Y W V P O T S E O O M
N F O E N C M O S H I A N S S Z A E R N S U N D M
S T N M D H A G N P X E I T V W G O E M J L E O A
V O G L A I N V I D O C E L O M G J A S B N L C T
H R I R Q A O A L R R E S C S G C M N D I M Z M A
M W M S F N Q E E O E E I N S E T F O L Q H I N K
H C E G E L T M U U T M H N N O I E O I J T C P I
B E R B O R X N S L H F U R C C H T P L N B F X A
S E S P N G S M O N S C L A E P P N N W A S E E U
O X I D P J T Q A F M U F O A R V L T E S C N S T



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Madang i lukautim Longbod Wol Sempionsip



Ol meri Madang i kisim sef bod long Sefing Asosiesen PNG.

Caroline Tiriman i raitim
PRESIDEN bilong Sefing Asosiesen bilong Papua Niugini i tok em i amamas tru long tok welkam long planti intenesenel sefa husat bai kam long Wol Sef Lig Longbod Wol Sempionsip long Madang. Andrew Abel i mekim dispela toktok pastaim long ol i opim dispela bikpela resis bilong Men's na Women's Longbod Wol Sempionsip long Tupira Surf Resort.

Dispela em bai namba wan taim tru dispela sempionsip i kamap long Papua Niugini, na ol kantri olsem Australia, Hawaii, Peru, South Africa, France, Great Britain, United States, Brazil, Japan, Reunion Island bai resis. Papua Niugini gat tupela waikat sefa husat bai stap tu long dispela resis. Mista Abel i tok sefing em i wampela kain spot i wok long pulim planti pipel long go lukim PNG.

Australia i mas strongim wok poroman na sekyuriti



Ol memba bilong Saina Nevi i wet long Australia Nevi woa sip i kamap.

Caroline Tiriman i raitim
WANPELA savemeri long Pasifik politikis i wanbel long toktok bilong Oposisen long Australia olsem Australia i wok long lus tingting long ol wok sekyuriti long Pasifik rijn na long Australia yet. Dr Tess Newton Cain i wanbel long toktok bilong Richard Marles, tokman bilong Oposisen long Difens husat i bin toktok long miting bilong Australia Stratejik Polisi Institut long Canberra long dispela wik. Mista Marles husat i bin palamen seketeri bilong

Pasifik ailan long gavman bilong Julia Gillard, i sutim tok long Australia olsem em i wok long wari tumas long ol kantri long Midel Is husat i stap longwe tumas na i lus tingting long Pasifik rijn we Australia i stap insait. Mista Marles husat i memba bilong Australia Leba pati i tok tu olsem ol kantri bilong Pasifik nau i wok long lukim olsem Australia i no wari long ol. Long dispela taim sampela Pasifik kantri i gat ol wokbung wantaim Saina na Rasia na dispela i mekim Australia i wari.

FSII memba baiklinim Nesenel Riferal Hospital



Olgeta eksekutiv bilong FSII i givim nebulaisa masin long Honiara Pikinini klinik.

Caroline Tiriman i raitim
SIF Eksekutiv Opisabilong Forum Solomon Ailan Intenesenel (FSII) i tok planti sapota bilong grup bilong em na ol narapla sitisen long Honiara bai klinim ol ples raunim Nesenell Referral Hospital long wiken. Benjamin Afuga i tok dispela klinap bai kamap tumora na tu long Sande na bai ol i rausim ol pipia em ol

pipel i save tromoi nating long haus sik. Em i tok tu olsem, astingting bilong dispela wok em bilong rausim ol tin, ol botol na ol narapela samting em ol natnat i save stap long en na kamapim ol nupela. Dispela klinap i kamap tu long wankain taim Honiara Siti Kaunsil i wok long lukluk long painim ol gutpela rot bilong rausim na kontrolim ol pipia long siti.

Australia na EU i helpim gut egrikalsa risets bilong NARI

DAIREKTA Jeneral long Papua Niugini Nesenel Egrikalsa Risets Institut o NARI, Dr Sergie Bang i tok mani i kam long ol narapela kantri na dona ejensi em i impoten long mekim wok risets bilong ol. Dr Bang i tok nau yet, NARI i wok long mekim ol wok risets inap 30 yia long kantri. Em i tok planti bilong dispela mani i save kam long

Australia Senta bilong Intenesenel Egrikalsa Risets na Yuropian Yunion (EU). Dr Bang i tok PNG gavman nau i givim mani long ranim NARI, na tu long mekim sampela risets wok bilong ol. Long wik i go pinis, ol i bin opim wanpela Rais Miling Teknoloji projek long Morobe Provins. Mani bilong dispela projek i bin kam long Incentive Fund bilong Australia.

Australia i helpim NARI long groim rais

Sam Seke i raitim
NESENEL Egrikalsa Risets Institut bilong Papua Niugini (NARI) i luksave long rais olsem wanpela impoten kaikai bilong kantri. Na gavman i tokaut pinis olsem em i laik lukim PNG i kamap indipenden long groim rais na kamap ekspota bilong rais. NARI i wok long mekim risets long kamapim ol kain kain rais we i gutpela long groim long ol kain kian hap long kantri na we i gat planti kaikai long en.

Dairekta Jeneral long NARI, Dr Sergie Bang i tok narapela samting ol rais fama long PNG i save painim hat tru long en em long milim o pasin bilong rausim skin bilong rais. Dr Bang i tok tenyu long heli pim bilong gavman bilong Australia anit long Incentive Fund bilong en - long wanpela Rice Milling Technology risets long Morobe Provins. Foren Minista bilong Australia, Julie Bishop i opim dispela Rice Milling Technology long taim em i go lukluk

I gat bikpela wari olsem ol pis bai sot



WWF Gizo Inshore Fish Aggregating Device raft long Solomon Ailan.

Sam Seke i raitim
WANPELA miting bilong ol het bilong fiseris long Pasifik i lukim olsem kostal fiseris long rijn bai bagarap olgeta na ol i mas stretim hariap. Dairekta bilong Fiseris long Sekretariat bilong Pasifik Komuniti, Moses Amos i tok ol saintis i lukim dispela hevi long sampela data na infomesen ol i gat nau. Em i tok ol i lukim olsem i go inap long 2030, bai ol kain kain pis klostu long nambis bai sot tru, na ol ailan kantri long Pasifik bai nidim samting olsem 200 tausen metrik tan bilong pis. Mista Amos i tok ol het bi-

long fiseris long 22 Pasifik kantri na teritori i toktok long dispela wari long Noumea long Niu Kaledonia long dispela wik. Em i tok miting i wanbel pinis long kolektim moa data long kostal fiseris long wan wan kantri, na bungim ol dispela infomesen long lukim gut wanem i stap long sait long ol pis klostu long nambis. Mista Amos i tok Forum Fiseris Ejensi i gat planti ol data i stap long ol tuna pis long bik solwara, tasol i no gat gutpela data na infomesen i stap long kostal fiseris ol pipel long Pasifik i save yusim olgeta de.

No gat plen bilong rausim ol refuji na long Manus



Manus ditensen senta delta kompaun.

Caroline Tiriman i raitim
MEMBA bilong Manus Open long Palamen, Ronny Knight i singautim gavman bilong PNG na Australia long tok klia long wanem rot ol bai bihainim long rausim hariap ol asailum sika na ol refuji long Manus ditensen senta. Mista Knight i mekim dispela toktok bihain long Plening Minista, Charles Abel i tokaut long wik i go pinis olsem bai ol i pasim senta long mun Oktoba long dispela yia. Australia Minista bilong Foren Afeas, Julie Bishop na Minista bilong Imigresen na

Boda Proteksen, Peter Dutton i bin bung long Australia na PNG ministerial miting long Madang long wik i go pinis. Las yia, Australia i bin tokaut olsem em bai pasim dispela senta, tasol no gat wanpela gutpela toktok i kamap yet, na moa long 800 asailum na ol refuji stap yet long Manus. Mista Knight i tok maski ol i tokaut long mun Oktoba long pasim dispela senta, em i no amamas long wanem miting bilong ol minista ya i no bin tok save long wanpela klia rot ol bai autim ol dispela lain long ditensen senta.

El Nino bringim bikpela renna tait long Peru

BIKPELA senis long solwara long Pasifik klostu long Peru i kamapim bikpela rentruna ol wara i taitna i mekim graun long olmaunten i bruk i go daunna bagarapim ol ples na kilim planti pipel na ol enimal. Ol rot i bagarap na wara i bagarapim ol kaikai long gaden tu.

Samting olsem 62 pipel i dai na moa long 70,000 i no gat hausnau bikos long ol hevi dispela bikpela ren i kamapim long Peru.

Praim Minista Fernando Zavala i tok hap namba bilong Peru i stap nau long stet ov imejensi bikos long ol bikpela bagarap i kamap na gavman i mas salim ol wok man na ol kaikai na arapela imejensi samting long helpim ol pipel. Em i tok planti bilong ol i stap long noten hap bilong kantri we bikpela moa ren i wok long pundaun.

Dispela El Nino i mekim Pasifik solwara i hat, nabai i wok long kamap yet long nambis long is kos bilong Peru i go inap long mun Epril, Dimitri Gutierrez, wanpela saintis long El Nino komiti bilong Peru i tok.

Gavman i makim Jorge Chavez, wanpela ami jeneral long go pas long ol wok bilong gavman long stretim



Tait wara i bagarapim ples na ol i pulim dispela meri long rop i go long gutpela hap.

dispela hevi.

Chavez i tok, "Mipela i no bin lukim kain hevi ol sem bipo.

"Long sot pela taim tasol, solwara i hat na i no gat win long stopim dispela samting i kam long bikples."

Sampela saientisi tok kalimet senis bai mekim El Nino i kamap klostuklostu na i kamapim strongpela win naren.

Ol bris i bruk long taim wara i solap na brukim graun na i gat stori bilong ol pik na kau em wara i karimol i go na tromoi ol long nambis.

"No ken pret hariap, gavman i save long wok bilong en," Presiden Pedro Pablo Kuczynski i tok long wan pela intaviu long televisen.

Tasol em i tokim ol pipel i no ken go klostu long olwira.

Long Lima, kapital siti bilong Peru, olskul i pas na wara long tep i sot bikos ol pipia i go insait long wara tritment plent. Ol pipel i resis long baim botol wara na sampela stua i sot long wara.

Plan i pipel bilong Peru husat i kisim taim long bikpela renna win em ol tarangu lain. Planti bilong ol i wokim ol haus long ples we tait i save ran, tasol inap moa long 20 yia, dispela hap i drai.

"I no gat pawa, no gat wara bilong dring... no gat transpot bikos wara i kapa-sait long olstrit," Valentin Fernandez, meya bilong Nuevo Chimbote taun i tok.

Ol rebel paitmen digim hul i go kamap long Damascus na pait



Smok i kamap long Jobar bihain long ol balus bilong gavman i dropim bom long eria ol rebel i bin kontrolim.

BIKPELA pait i bin kamap long las wik Sande bihain long ol rebel paitman i digim ol hul i go kamap insait long Damascus na ol i kam ausait na pait wantaim ol soldia bilong gavman bilong Syria. Ol ripot i tok dispela em i namba wan taim long ol i brukim bikpela banis ol soldia bilong Syria i bin sanapim raun long hap we ol i stap long en. Ol rebel pait lain i bin stap long tupela kem long isten hap bilong Damascus.

Gavman bilong Bashar al-Assad i wok long traime soim olsem olgeta samting i stap orait, tasol ol soldia bilong en i wok long dropim bom long arere bilong siti.

Ol pipel i tok ol sel bilong ol roket i wok long pundaun namel long siti. Na Damascus Today, wanpela Face-

book grup bilong ol ektivis, i ripot olsem ol balus bilong gavman i bomim dispela hap we ol rebel paitman i pait wantaim ol soldia bilong gavman.

Dispela grup i tok ol soldia bilong gavman wanaim ol tenk i kamap long eria we ol rebel paitman i bin go insait long Damascus na pait wantaim ol.

Dispela woa namel long gavman bilong Syria na ol rebel i bin stap inap 6-pela yia nau. Ripot i tok planti soldia bilong Syria i lusim wok olsem na gavman i kisim ol lain nabaut long helpim ol soldia bilong en. Sampela bilong ol dispela lain em ol Shia militia bilong Iran, Iraq, Lebanon na ol arapela kantri long Midel Is.

Stet midia bilong Syrian i tok ol soldia bilong gavman

i rausim i dispela rebel paitman em wanpela grup bilong al-Qaida i bin go pas long en long taim ol i kam aut long ol hul long biknait na statim pait.

Ol rebel i bin pairapim tupela bikpela kar bom long Sande moning klostu long Jobar. Ol lain LLC i tok ol i bin mekim dispela.

Gavman i wok long putim presa long ol rebel long givap ol eria ol i kontrolim insait long Damscus bihain long ol i kisim bek Aleppo, sentral Homs na ol arapela sabeb long Damascus.

Planti tausen ol rebel paitman wantaim ol famili bilong ol na ol lain husat i egensim gavman long dispela hap, i tokorait long gavman i larim ol i go stap long not west hap bilng kantri em ol rebel i kontrolim.


Ol Somali pairret i larim oil tenker i go fri

OL pairret bilong Somalia husat i bin holim na kalabusim wanpela Comoros-flag oil tenka i larim dispela sip i go fri wantaim ol 8-pela wokman bilong sip husat i bilong Sri Lankan. Ol pairret i no bin askim long kisim mani long taim ol i kalbusim dispela sip. Dispela i namba wan taim ol pairret i mekim dispela kain pasin bihain long ol i bin stopim long 2012.

Ol i larim sip i go fri bihain long wanpela lain polis bilong gavman i kamap na paia long gan long ol. Bihain long dispela i bin gat wanpela bung toktok i kamap namel long ol pairret, ol klen lida na ol polis.

"Ol toktok i kamap long apinun bihain long lain bilong gavman i sut long ol pairret. Mipela i singautim ol soldia i kam bek na ol pairret i lukim olsem na ol i lusim na go," Abdurahman Mohamad Hassan, dairekta jeneral bilong maritaim polis fos bilong Puntland i tok.

Wanpela pairret i tok ol i no kisim mani. Long ol narapela taim we ol pairret i holim kalabusim ol sip, ol i save holim ol kru bilong sip i stap inap papa bilong sip i baim



Dispela poto i soim Aris 13 oil tenka ol pairret bilong Somalia i bin holim tasol bihain ol i larim i go fri gen. Ol i bin kisim dispela poto long taim sip i sua long bris long Gladstone, Australia, long 2014.

mani ol i askim long en. Tude ol 8-pela pipel bilong Iran i stap yet long han bilong ol pairret bilong Somalia.

Ol pairret i tok ol i wanbel long no ken askim long mani bikos ol i painim aut olsem ol liklik bisnisman bilong Somalia i bin haia long dispela sip, Aris 13, husat i karim oil long Djibouti i go long Mogadisu, kapital long Somalia. Ol pairret i save pret long hatim bel bilong ol bisnisman bilong Somalia bikos ol dispela lain i gat bikpela pawa.

"Bihain long mipela i kisim tok save olsem ol bisnis lain bilong Somaliali haia long dispela oil tenka, mipela i larim i go fri na i no askim long mani," pairret Abdullahi i tokim Reuters nius ejensi.

Ol lain i tok pasin ol pairret i mekim long klarim sip i go fri, i soim olsem program bilong gavman long stopim ol pairret long Puntland rijon i wok gut. Gavman bilong United Arab Emirates i givim mani bilong kamapim dispela program.

Chuck Berry, king bilong rock'n'roll i dai



Chuck Berry i sanap wanaim Bill Clinton na Tony Blair long June 1997.

WANPELA saveman bilong pilai gita, Chuck Berry, husat i gat nem long pilai ol kain kain stail music long taim rock'n'roll i bin stat nupela, i dai long las wik Sarere long haus bilong em long Missouri, USA. Em i bin gat 90 krismas.

Wanpela polis ripot i tok ol i kisim wanpela ripot na long taim ol i go long haus helpim em, ol i lukim em i dai pinis.

Charles Edward Anderson Berry Sr, i pikinini bilong wanpela dikon bilong sios. Mama i bin karim em long St Louis long 1926. Em i stat long pilai gita long ttaim em i stap long haiskul we em i save go pilai long ol pati na i gat stail bilong em

long holim gita na wokim stail danis bilong em.

Ol singsing bilong em planti lain long wol i save gut long en em Rock & Roll Music, Roll Over Beethoven, Johnny B Good na Schooldays.

Planti ol top singa na ol lida bilong wol tu i save gut long en na i amamas long inaitim em i go pilai long ol bikpela bung bilong ol. Tasol em i gat nem olsem wanpela singa husat i win tru long stail bilong Rock n Roll.

Ol biknem singa na ol lida i wok long salim tok sori bilong ol i go long famili bilong Chuck Berry.

Strepela wok bilong digim gol, kopa, wel as bilong gutpela developmen



Lidasip, data menesmen na trespensi long ekstraktiv selta woksop i kisim olgeta ki gavman, praivet na sivil sosaiti stekholda long kibung. Foto: AHC

PAPUA Niugini i kisim nara-pela mak long soim gutpela wok bilong kisim gol, kopa na wel long graun.

Pasifik Lidasip na Gavanens Presink na Papua Niugini Seketariat bilong Ekstrativ Indastris Trespensi Inisitiv (PNGEITI) i go pas long tri-de woksop we i bin kamap long Pot Mosbi long las wik.

Dispela woksop i lukim ol risos sekta na ol stekholda long gavman, indastri na sivil sosaiti i kamap na tokaut long wei ol i save mekim wok.

Papua Niugini i aplai long joinim EITI tripela yia i go pinis, long luksave long ol gutpela samting ol sitisen na investa i gat long kamapim gut wok bilong trespensi long menesim ol samting bilong kantri.

Woksop ripot bilong PNGEIRI long 2014 i tokaut long ol sans o rot bilong strongim dispela sekta long sait bilong ripot na menesmen.

Deputi Seketeri bilong Tre-seri, Manu Momo, i tok Gavman i mekim planti senis wantaim helpim bilong EITI. "Maski long ol hevi, mipela i mekim planti senis long bungim wol EITI standet," em i tok.

"Kamap bilong EITI i gat

strong long kamapim gutpela senis wantaim moa akauntabiliti na trespensi."

Dispela i min wanpela i gat inap tingting i stap bilong kamapim moa toktok long kamapim senis long wei bilong mekim wok na bilong kamapim gutpela senis long sindaun bilong manmeri."

Hetman bilong PNGEITI Lucas Alkan i tok: "Dispela i gutpela wok bung namel long Prisink na PNGEITI we i join wantaim long kamapim gutpela wok na trespensi long ekstraktiv sekta."

"Wantaim strongpela lidasip, dispela indastri i ken stap olsem pletfom bilong sosel na ikonmik developmen."

Long tok orait long PNG olsem em i memba kantri bilong EITI grup i bikpela mak PNG i kamap long em.

Dispela bai kamapim gutpela nem bilong PNG long sait bilong mekim bisnis olsem em i kantri we wanpela i ken kamapim gutpela wok bisnis.

Pasifik Lidasip na Gavanens Presink i join tingting bilong Gavman bilong PNG na Australia long developim gutpela na strepela lidasip husat bai strongim gro bilong bisnis na bringim sevis i go long manmeri.

Australia Hai Komisen

Kausila bilong Ikonmik Gavmens, Jodi McAlister i tok pasin bilong kamapim gutpela wok long indastri, moa long ol risos kampani i salens long serim wantaim Australia.

"Wok bilong kisim ol samting olsem gol, kopa na wel i bikpela samting long strongim ikonmik bilong Papua Niugini na Australia," em i ok.

"Salens nau i stap long tupela kantri em long lukim olsem win mani bilong dispela ol non-riniuebel risoses i stap bilong helpim ol yangpela bilong tupela kantri long bihain taim."

McAlister i tok taim wok bilong ol risos i no stap long taim tasol i tok wantaim gutpela lidasip na menesmen bilong lukautim win mani bilong sekta dispela i ken strongim tru kantri long nau na bihaini taim.

Em i tok PNGEITI i oge-naisesen gavman i go pas long em wantaim sapot bilong ol kampani, sivil sosaiti grup, investa na ol intanesenel oganaisesen.

Em i kamapim pletfom bilong dispela ol grup long lukluk bek, skelim na givim ripot long wanem ol samting em ol kampani i baim na wanem gavman i kisim long em long dispela sekta.

Lau tok PNG ikonmi bai kamap strong



Turis sip i kam raun long ol ples long PNG. Foto: Internet

JAMES Lau, menesing dairekta bilong Rimbunan Hijau (RH) Grup i tok em i lukim ol developmen we em i bilip i mak bilong Papua Niugini ikonmi i kamap strong.

Em i tok dispela ol developmen i stap long wok bilong hotel, wok didiman, maining na wok redi bilong 2018 Apec kibung.

Em i tok prais bilong ges i strong gen wantaim 35 pesen gro we long las 12-pela mun dispela is tap daun-bilo na dispela i wankain long prais bilong gol.

Wantaim dispela em i tok i gutpela long bringim moa investa tu i kam insait long kantri na strongim ikonmi.

Tasol em i tok hevi bilong prais bilong ol komoditi olsem kopa, wel na ges bai pasim liklik kantri long sot i go long medium taim.

Long sait bilong Stanley Hotel Lau i tok bihain long hotel i op na bikos long gutpela stap bilong em planti manmeri na ol oganaisesen

i bukim ol konperens rum long bung.

Em i tok hotel yet i stap long wol standet na em i bilip dispela bai bringim moa ol ovasis kastoma long go bung long hotel.

Moa long dispela em i tok sapos dispela hotel i no stap, ol manmeri na oganaisesen bai go long narapela hap na bung.

Em i tok maski sapos em bai kisim taim ol ovasis visita i kam long kantri, dispela i min PNG i mas redi long kamapim ol standet hotel long pulim ol kastoma i kam long kantri.

Em i tok hotel yet i wanpela samting we bai pulim ol manmeri long kam long kantri long divleopmen bilong Pot Mosbi i go long bihain taim.

Long Vision City Lau i tok stua i gro na develop na dispela i strongim stap bilong em olsem wanpela bikpela stua.

Wok bilong mekim bikpela stua i go long 8000

skwea mita i givim planti spes na amamasim ol kampani husat i rentim dispela ples na ol kastoma husat i go long baim samting.

Dispela senis i lukim i gat ples bilong ol manmeri husat i silip long Stanley Hotel long wokabaut i go i kam long stua.

Long wok bilong timba o diwai, Lau i tok prais bilong tropikel timba i go daun na i stap olsem long sampela taim na dispela i givim hevi long wok bilong RH.

Em i tok ekspot takis gavman i kamap long 2016 long salim timba i givim moa bikpela hevi long kampani na i lukim sampela hap bilong em i pinis long wok.

"Taim kain disisen i kamap em i lukim ol projek i pas na planti manmeri i no gat wok," Lau i tok.

"Indastri bin tokaut long ol hevi em i bungim na Minista bilong Fores (Douglas Tomuriesa) i bin toktok tu tasol wok nau i stap long gavman long mekim disisen."

Maritaim atoriti lonsim websait

Paul Zuvani i raitim

SENI long websait bilong Nesenel Maritaim Sefti Atoriti (NMSA) bai givim gutpela toktok long pablik long save long wok bilong atoriti na helpim ol i mas kisim, Minista bilong Transport Malakai Tabar i tok.

Em i tok senis i kamap bihainim gutpela wok na disisen NMSA bod i mekim long las foapela na faipela yia na wanpela bilong dispela ol disisen em gutpela kamap bilong websait.

Em i tok kompyuta i samting planti manmeri i yusim long dispela taim na i gutpela long atoriti i kamapim ol senis long go wantaim ol senis we i wok long kamap nau.

"Mi olsem Minista bai oltaim givim sapot bilong mi long ol polisi na lo bilong NMSA," Tabar i tok.

"Wantaim dispela mi laik lukim i gat senis long Siping Ekt long sapatim bisnis, long gavman i karimaut rekomen-

desen bilong Inkwairi we i kamap long hevi bilong Rabaul Kwin sip kapsait, wok go het bilong rekomendesen bilong NMSA na kamap long ol kibung bilong Memba odit skim (ICSAS).

"Mi bilip wantaim dispela ol senis NMSA bai givim gutpela senis long ol manmeri."

Tabar i tok PNG i bin laki long go long namba wan odit bilong Intanesenel Maritaim Oganaisesen we NMSA i memba long em.

Em i tok amamas long kamap Minista bilong tripela sekta bilong trespot we i kisim graun, solwara na antap long skai.

Tabar i no bin inap long kamap Seketeri bilong Trespot, Roy Mumu i makim em na givim toktok.

Siaman bilong NMSA bod Peter Humphery i tok 5-yia Koperet Plen bilong NMSA (2015 - 2019) i tok long strategik rot bilong atoriti long givim kain sevis long manmeri.

Em i tok aninit long lukaut bilong sif eksekutiv opisa bilong NMSA, Paul Unas, atoriti i lukluk long kamapim planti senis long givim gutpela sevis long ol manmeri.

Em i tok nupela senis long web (kompyuta) pes i klia we manmeri i ken go long em na kisim toksave long wanem samting ol i mas mekim long kisim helpim long atoriti.

"Wantaim ol senis i wok long kamap long dispela taim, em i gutpela long lukim NMSA i kamap wantaim senis long web pes bilong em," Humphery i tok.

"Plantil ol sip na ol manmeri husat iron long solwara i laikim kain senis long helpim long em."

NMSA olsem wanpela han bilong gavman, i stap bilong givim toksave long ol manmeri husat iron long sip o bot long kain ol de i kamap, sapos em i san, ren, win o bikpela solwara na olsem ol manmeri i no ken ron na ol sip i mas was taim ol iron.



Ol Nesenel Maritaim Sefti Atoriti opisa i kisim poto long taim ol i lonsim websait bilong ol. Foto: Nicky Bernard

BCL bos tokaut long rot bilong opim Panguna main



Panguna Main we i pas bikos long hevi bilong pait. Foto: Internet

Planti bisnis han em as bilong CPL stap strong

PLANTI bisnis haus long dispela taim i tok ol i no wok hat tumas bikos long no gat planti kastoma, Ravi Singh, sif eksekutiv opisa bilong City Pharmacy Limited (CPL) i tok.

Tasol em i tok long kampani bilong em olsem ol i no bungim hevi bilong mani bikos kampani bilong em i ranim planti kain wok.

Dispela ol wok em retil stua olsem helt, kaikai, haus na klos.

“Wok bilong supamakot bisnis long Pot Mosbi i go daun tasol long sait bilong helt, wok bilong City Pharmacy we i salim marasin i go antap,” Ravi Singh i tok.

“Hardwea bisnis tu i go antap taim mipela i makim wantaim long wok bilong las yia.

“Planti bilong sapot i kam long aut stesin bilong CPL long Hailans rijon.

“Dispela em bikos nau em i taim bilong kopi sisen.

Singh i tok namel long las

12-pela mun CPL i bin opim Stop N Shop Haba Siti i Stop N Shop Koki.

Em i tok dispela tupela stua em ol wol klas stua na ol i laik lukim stap bilong dispela tupela stua i luk gut.

Long dispela ol kastoma i tok ol i amamas long kamap bilong dispela tupela stua.

Singh i tok ol kastoma i save lukluk long klinpela pasin na ol lait i stap insait long stua.

“Mipela i laikim stap bilong ol stua bilong mipela i luk wankain long ol stua long Australia.

“Mipela i amamas long prut na kumu divisen bilong mipela bikos ol i save kamapim gut mani moa long Hailans rijon na Sentral provins.

“Foapela de long wik mipela i save ranim sata balus long Mt Hagen na kam long Mosbi na faivpela de long wik mipela i gat ol fama husat i kam long salim prut

na kumu bilong ol long depo long Waigani. Na wantaim long dispela mipela i save salim kar i go long ol liklik ples long kisim ol prut na kumu.”

“Tasol bikpela salens bilong mipela em long ol haus stua bilong mipela olsem i mas gat inap ol haus long lukautim prut na kumu mipela i baim long ol saplaia bilong mipela.

“Mipela i save askim ol saplaia bilong mipela long lukim gutpela ol prut na kumu i stap gut ol i mas putim long gutpela mak long lukautim ol prut na kumu i stap gut long sampela taim.

“Long dispela mipela i gat gutpela poroman bilong mipela long Mt Hagen.

Long kamapim sampela moa stua, Singh i tok dispela yia ol i lukluk long opim Waigani Sentral stua we i bagarap bikos long paia, tasol nau ol i stretim pinis na bai opim long dispela yia.

SAPOS Bogenvil kopa main i mas op, hevi bilong ol stekholda olsem Bogenvil Kopa Limited (BCL) i mas stret pastaim, BCL bod siaman Rob Burns i tok.

Em i mekim dispela tok long taim ol toktok bilong opim main i wok long kamap.

Em i tok dispela i as we long Jun 2016 Rio Tinto i tok em i stap longwe long ol tok na ol wok bilong Panguna Main olsem dispela ol hevi mas stret.

Long dispela taim tu Rio Tinto i givim sea bilong em long nesenel na Bogenvil gavman.

“Bikos long dispela mipela i no tingting planti moa long toktok bilong ol hevi bikos mipela i no moa ol bikpela sea holda bilong main. Dispela i mekim mipela i pilim fri,” Burns i tok.

Nupela bod bilong BCL nau i gat Sir Moi Avei, Dem Carol Kidu, Sir Rabbie Namaliu na bipo BCL menesing dairekta Peter Taylor.

“Wantaim sapot long ol seaholda, mipela i strongim tingting bilong mipela long kam bek gen long wok bilong eksploresen na wok bi-

long strongim developmen bilong main na mekim mani,” Burns i tok.

“Developmen bilong nupela Panguna main i gutpela bilong olgeta stekholda.”

Burns i tok nupela daireksen i bilong kamapim gen main we i bin pas long 1989 bikos long hevi bilong pait.

Em i tok taim main i pas planti hevi i kamap. Long taim main i op, em i bikpela open pit kopa main long wol na long dispela taim i save kamapim 40 pesen gros domestik prodak (GDP) bilong Papua Niugini.

Maski wok i bin kamap na i stap pinis long sampela taim i gat olsem wan (1) bilien tan bilong kopa risev na 12 milien gol auns i stap yet, Porter Geo konsalting kampani i tok.

Long Ogas, 2014 Atonomas Bogenvil Gavman (ABC) i mekim rot long opim gen main, wantaim nupela maining lo tasol las yia Rio Tinto i mekim disisen long daunim sampela wok bilong em.

Dispela em long taim em i plen long givim 53.8 pesen sea bilong BCL na 17.4 pesen i go long gavman na

36.4 pesen i go long ABG.

Tupela gavman nau i gat 36.4 pesen long BCL, arapela hap sea em Yuropian seaholda i holim (4 pesen) na praivet investa aninit long Australia Sea Maket i gat 23 pesen.

Praim Minista Peter O’Neill i tok em bai givim 17.4 pesen sea bilong PNG gavman i go long ol papa graun bilong main na ol manmeri bilong Bogenvil na i no long ABG.

Long dispela Burns i tok long husat i papa bilong dispela ol sea em bikpela samting.

Dispela bai mekim developmen bilong main i kamap gut. Ol arapela tok we Burns i tok i mas stret pastaim em:

- Lukim ABG i mas tokaut long givim sapot long BCL long opim na developim gen main;
- BCL i mas mekim nupela main lis na long taim em i laik mekim wok;
- Mas lusim graun i stap bilong kamapim projek;
- I mas stap seif na go fri long we main i stap;
- Lukim tupela gavman i wok wantaim.

Celso: Hevi bilong pasim kago kam insait long kantri givim hevi

FISERIS industri i bungim bikpela hevi long go bikpela na mekim mani, siaman bilong Fising Industri Asosiesen Pete Celso i tok.

Em i bilip dispela em bikos gavman i no gat lo bilong pasim ol kago, olsem ol tin pins i kam insait long kantri.

“Mipela i gat inap lokal menufeksa na kenari long givim saplai long ol kastoma bilong mipela long kantri,” Celso i tok.

“Hia yu wok long traim long strongim ol lokal produsa long mekim ol samting tasol mipela i no gat pawa long pasim ol samting olsem tin pis bilong narapela kantri long kam insait na dispela i givim hevi.

“Mi lukim planti ol tuna i

stap insait long tin na i kam insait em ol tuna ol kampani long narapela kantri i kisim, putim long tin na bihain salim i kam gen long mipela long baim.

“Dispela mi ting i no gutpela na i stret.

“Ol i save mekim bisnis long liklik kost bikos gavman bilong ol i save sapotim ol. Dispela i no wankain long hia.”

Wanpela as long strongim fiseris industri em long kamapim Pasifik Industriel Jon long Madang.

I gat bilip PMIZ inap long holim 10-pela tuna kenari na ol arapela faktori wantaim.

Tasol hevi long projek i no stat hariap na dispela i lukim kost bilong sanapim gut dispela industrial senta i wok

long go antap tu.

Long lukluk bilong EXIM benk bilong Saina, we em bai fanim olsem 78 pesen wok, mani plen bilong sanapim jon i stap long K195 milien (US\$61m) i go antap long K300 milien (US\$194m).

Dispela em mani mak bilong namba wan hap tasol kos bai go antap moa taim namba tu hap i kamap.

Anton Yagama husat i Vais Minista bilong Fiseris it ok wok bilong sanapim ol haus bai stat long namba wan hap bilong dispela yia.

Celso i menesing dairekta bilong RD Tuna Canneries long Lae i tok em save projek bai stat tasol i ting bikpela salens em long lukim tru olsem projek i kamap.

Australia sapotim Bogenvil praimeru skul

AUSTRALIA Gavman i sapotim faivpela Bogenvil praimeru skul long infrastraksa developmen aninit long pablik-praivet patnasip (PPP) wantaim Digi-cel Faundesen.

Gavman bilong Papua Niugini na Atonomus Bogenvil Gavman (ABG) i givim luksave tu long dispela helpim.

Long dispela helpim Kepesia Praimeru Skul long Sentral Bogenvil i wanpela bilong ol skul we i kisim helpim long dispela.

Long dispela Australia Gav-

man i helpim long stretim dabol klasrum bilong ol na putim tu sola panel na toilet bilong ol mangi na meri.

Australia Deputi Hai Komisina long Papua Niugini Mis Bronte Moules i tok Australia i wok klostu wantaim PNG Gavman na ABG long strongim edukesen sistem bilong Papua Niugini.

“Wok bilong sapotim edukesen i bikpela samting long ikonmik wok poroman namel long Australia na Papua Niugini,” Moules i tok.

“Dispela em bikos edukesen i helpim long kamapim faundesen bilong ol manmeri i ken gat save long mekim wok.”

Moules na Beatrice Mahuru, sif eksekutiv opisa bilong Digi-cel Faundesen i givim dispela nupela haus i go long Kepesia Praimeru Skul.

Dispela helpim long skul infrastraksa i piksa bilong wok poroman i stap namel long gavman bilong Australia, praivet sekta na lokal komyuniti.

(Long lep han) John Lee, Kepesia Praimeru Skul principal; Beatrice Mahuru, Digi-cel Faundesen CEO; Thomas Pa’ataku ABG Edukesen Minista, Bronte Moules, AHC Deputi Hai Komisina, Justin Kehatsin, ABG Edukesen Seketeri na Ricky Sort, Kepesia sif. Foto: AHC



Didiman toktok



Profesa John Warren - Vais Sansela, PNG Yunivesiti bilong Nesurel Risos na Envairomen i raitim

Gutpela mani bilong balsa...

Taim pinisim gut ol dispela 5-pla step we i soim, fama bai lukim balsa diwai bilong em i katim go daun na katim i go long raun log bilong salim long kampani: fama bai kisim moa mani taim em i kamapim bikpela raun log volum na tu salim long gutpela prais.

5-pela step long salim balsa raun log

Tok i go pas

Ol fama i save planim kainkain samting long salim na kisim gutpela mani na balsa em i wanpela bilong ol. Balsa em i wanpela gutpela diwai we ol fama long ENBP ken planim long kisim mani bihain taim ol i salim long kampani. Fama bai no gat gutpela yus bilong balsa – em bilong planim, katim na salim go ovasis maket tasol. Husat fama i save groim balsa i mas save long rot bilong salim balsa bilong em na dispela Fact Sheet (#4 of 6) bai soim. I gat 5-pela step long salim balsa raun log.

Step 1: BPA – Painim kampani husat laik baim balsa bilong yu na pulimapim BPA fom

Lukim somil klostu long yu o nogat lukim PNG Fores Atoriti long Kerevat na painimaut kampani husat i ken baim balsa bilong yu. Traim long kisim kampani we baim givim gutpela prais long diwai bilong yu na tu yu mas save long wanem kain diwai somil laikim.

Balsa kampani: Salim balsa bilong yu long raun log volum long kisim gutpela prais. Pulimapim Balsa Purchasing Agreement fom (BPA) wantaim kampani husat i baim balsa bilong yu.

Step 2: Pundaunim na katim sotpela sotpela

Katim diwai i go long log: Planti taim ol kampani yet save go katim balsa na kisim go long somil. Wokman bilong katim balsa bai yusim senso long katim daun diwai.

Mesaim diwai: Bai mesaim diwai i pundaun i stap long makim hap long katim na kisim raun log. Yusim senso na katim long hap makim long kisim raun log.

Step 3: Rausim skin, mesaim na makim

Rausim skin na makim: Rausim skin bilong raun log pinis redi long lotim. Makim na kisim tasol ol log we sais na gutpela olsem kampani i laikim. Sais bilong wanwan diwai rekotim insait long tali fom we yusim long wokim aut log volum na baim long fama.

Bagarap bilong diwai: Ol balsa kampani bai gat mak bilong kisim ol liklik sais diwai – raun log mesaim 19 cm em liklik tumas long kisim. Raun log tu i mas stret tasol na bai isi long katim insait long somil long kamapim saun bod. Dwai ben 38 mm em bikpela tumas na tu em ausait long mak we kampani i putim, olsem na lusim diwai stap long fil.

Gutpela diwai: Joket kamapim bikpela krunget long bel bilong diwai mekim na bai lusim sampela log volum bilong salim. Bikpela joket mekim na bagarapim gutpela diwai na dispela tu mekim em i lusim long volum – lusim bek diwai long fil.

Ret hat: Ret hat em i bagarap hap insait long bel bilong diwai we bai no inap soim insait long somil long kamapim gutpela saun bod. Makim ret hat wantaim kreon bikos em bai go hait bihain long sampela taim na hat long lukim na mak bilong kreon tasol bai stap.

Step 4: Mesarim raun long kisim longng tali

Mesaim raun log na kisim tali: Mesaim bikpela na longpela bilong olgeta raun log, katim bilong salim na yusim kreon long rait antap long wanwan raun log. Man bilong kisim tali bai rekotim mesamen bilong olgeta raun log na bihain bai yusim dispela rekot long wokim aut volum na baim fama.

Step 5: Balsa trak go long somil

Lotim balsa log na karim go long somil: Ol wokman bai lotim olgeta balsa log i go antap long bikpela balsa

NAQIA sekim ol pik indai nating long Madang

James G. Kila i raitim

OL DOKTA bilong enimal long Nesenel Egrikalsa na Kwarantini Atoriti (NAQIA) las wik i bin stap long Rempi viles long Not Kos Rot (NCR), Madang long mekim wok-painimaut long wanpela kain sik we i wok long kilim indai ol pik long dispela ples.

Madang Provinsal Dipatmen ov Egrikalsa na Laipstok Dairekta, Godfried Savi i tok olsem ol dispela saveman bilong NAQIA i bin go mekim wok painimaut long Rempi viles na ol arapela ples klostu bihain long ol i harim ripot olsem ol pik i wok long dai nating.

Em i tokaut olsem ol lain papa bilong ol pik long Rempi long stat bilong dispela mun i lukim olsem ol

pik bilong ol i kisim wanpela kain sik we ai bilong ol i tainim i go blu na ol wok-baut narakain na bihain ol i pundaun tasol na indai.

Mista Savi i tokaut olsem dispela em namba wan taim kain sik nogut i kamap long ol pik long dispela viles long Rempi na ol papa bilong ol pik ya i pret na go long Madang na givim ripot long opis bilong em.

Tupela enimal dokta bilong NAQIA i bin go raun long ol eria long Rempi viles long kisim ol sempol long tripela pik we i bin dai na tu ol i kisim stori long papa bilong ol dispela pig.

Sempol olsem spet na ol sampela hap skin bilong dispela ol pik i dai long Rempi em ol NAQIA enimal dokta bai karim i go mekim stadi long en long Lae na bihain ol

bai salim i go ovasis long sekim na painimaut wanem as tru dispela ol pik i dai.

Mista Savi i tok olsem ol lain papa bilong pik i guria tru long dispela nupela kain sik we i kilim indai enimal bilong ol na wantu tasol i bin go givim ripot long DAL provin-sal opis long Madang taun.

Em i tok pasin ol lain long Rempi viles long givim ripot bilong kain nupela sik no gut long ol enimal em i gutpela bikos dispela bai helpim long painim rot kwiktai na tu rot long banisim kain sik no gut long go bikpela.

Insait long narapela nius long sait long egrikalsa em wok seveilens o wok long banisim birua bilong sik bilong kokonas ol i kolim Bogia Kokonas Sindrom (BCS) i go het yet long Madang.

Ol opisa bilong NAQIA, DAL na Kokonas Industri Korporensen (KIK) wantaim sapot bilong polis i sekim yet ol kar na bas i go aut long Madang long sek-poin long Tapo namel long Madang-Ramu Haiwe na rausim ol samting olsem kru bilong kokonas, buai na ol arapela plent long go aut.

Dispela sik BCS em ol i painimaut namba wan taim long en long Yoro long Bogia distrik. Dispela sik i save kamap long ol binatang i kaikaim na kilim indai ol kokonas, na ol saveman i tokaut olsem nogat marasin long stopim dispela sik nogut. Olsem na nau yet bikpela banis em gavman egrikalsa ejensi i wok long putim long stopim sik long go long ol arapela kostal provins long PNG.

Kakao fama kisim fri trening long BSP

OL kakao fama bilong Bitapaka LLG insait long Kokopo distrik long Is Nu Briten givim bikpela tok tenkyu i go long Agmak na BSP long givim fri mani menesmen skul las wik Fraide 17 Mas.

Agmak Projek Menesa, Ismael Gar i tok ol i bin inap long mekim dispela tru long Produktiv Patnasip Egrikalsa Projek PPAP(Cocoa) wantaim Benk Saut Pasifik (BSP) we i ken helpim ol manmeri long ples long wei long yusim na lukautim mani.

Benk Saut Pasifik i ranim dispela trening bilong “Fi-

nansial Literacy”(FLT) bilong ol kakao fama insait Bitapaka LLG. Dispela trening i bungim 29 fama long kisim skul.

Namba wan hap bilong trening em “Savings” na namba tu hap em “Budgeting:Use Money Wisely.” Em i tok.

Em i tok tu olsem Agmak bai go het long wok patna wantaim BSP long givim aut dispela skul, na tu BSP bai go het long sekim ol fama husat i statim nupela pesonel akaun long lukim progres bilong ol.



BSP Lid treina Julie Mais givim skul long ol kakao fama long Makurapau viles.

Long Antaktika i kam long tropiks – nupela medikol trening sip

YWAM Medikol Sip i kisim wanpela 65-mita saplai sip, MV l’Astrolabe, long mekim wok bilong ol long Papua Niugini.

Bai ol i senisim nem bilong MV l’Astrolabe, i go long MV YWAM Liberty. Dispela sip bai i namba foa sip bilong YWAM long mekim ol wok bilong en long PNG. Bai em i helpim MV Pacific Link na MV YWAM PNG husat i mekim wok long PNG, na MV RUACH, bai kam joinim ol long pinis bilong dispela yia.

Dairekta bilong YWAM Medikol Sip PNG, Ken Mulligan i tok ol i kisim wanpela moa sip na bai givim hop long planti tausen pipel husat i sot tru long kisim helt sevis na trening.

“Ol helt kea salens long PNG i spesel bikos long ol ples i stap longwe tru. Mipela i wokbung wantaim Nesenel Dipatmen bilong

Helt na ol provinsal helt atoriti, we mipela inap long givim helt sevis long planti ol ples i stap longwe na givim tu trening long ol wokman na meri long tupela sip ya MV YWAM PNG na MV Pacific Link.

“Sapos i gat foapela sip i mekim wok bilong givim helt sevis ns trening i go long ol nambis na ailan bilong PNG,, em i olsem wanpela mirakel. Na i soim olsem sapos i gat wokbung bai ol samting i kamap gut.

Mista Mulligan i tingim wanpela pikinini meri nem bilong Mandy. Em i aipas long taim em i gat sikispela krismas biko ol katarek i bagarapim ai bilong em.

“Long lukim amamas long pes bilong papamama bilong em i bin wanpela spesel samting, bihain long ol dokta long sip i stretim gen ai bilong em,” Mista Mulli-



Nupela medikol trening sip

gan i tok.

Na planti moa pipel i bin kisim helpim. Long 2010 i kam inap nau, ol YWAM Medikol Sip i givim helt sevis long 648,062 pipel na trening long 145,567 pipel.

Dairekta bilong YWAM Medikol Sip, Brett Curtis, i tok wok bilong ol dispela sip bai kamap namel long nesenel na provinsal helt

atoriti, YWAM Ships Kona, Hawaii na ol arapela YWAM senta long ol arapela hap long wol.

Petron bilong YWAM Medikol Sip long PNG, Sir Rabbie Namaliu, i tok amamas na soim sapot bilong em long dispela nupela sip. Em i tok em i amamas long lukim wok bilong YWAM i kamap bikpela long PNG.

2017 NRL Dro bilong raun namba 4

Det	Hom	Awe	Pilai Graun	TV	Taim
Fonde, Mas 23			ANZ Stadium	Nine, Fox	8:05 pm
Fraide, Mas 24			Pepper Stediam	Fox	6:00 pm
Fraide, Mas 24			Suncorp Stadium	Nine, Fox	8:05 pm
Sarere, Mas 25			Brookvale Oval	Fox	4:30 pm
Sarere, Mas 25			ANZ Stadium	Fox	7:00 pm
Sarere, Mas 25			CBus Super Stadium	Fox	9:00 pm
Sande, Mas 26			Leichhardt Oval	Nine, Fox	4:00 pm
Sande, Mas 26			Jubilee Oval	Fox	6:30 pm

2017 NRL Lata | TELSTRA PREMIASIP

Posisen	Tim	P	W	L	D	B	F	A	+/-	Pts
1		3	3	0	0	0	52	28	24	6
2		3	3	0	0	0	74	54	20	6
3		3	2	1	0	0	74	54	20	4
4		3	2	1	0	0	68	54	14	4
5		3	2	1	0	0	80	70	10	4
6		3	2	1	0	0	49	66	-17	4
7		3	1	2	0	0	70	58	12	2
8		3	1	2	0	0	78	68	10	2
9		3	1	2	0	0	58	53	5	2
10		3	1	2	0	0	54	52	2	2
11		3	1	2	0	0	58	58	0	2
12		3	1	2	0	0	74	76	-2	2
13		3	1	2	0	0	60	66	-6	2
14		3	1	2	0	0	70	80	-10	2
15		3	1	2	0	0	48	72	-24	2
16		3	1	2	0	0	42	100	-58	2

Ol i rausim 3-pela Rabbitohs pilaia



Prop bilong South Sydney Rabbitohs, George Burgess i ran i go aut egensim ol Knight long Raun namba 3 bilong telestra Premiasip.

TRIPLELA pilaia bilong Rabbitohs, George Burgess, Heymel Hunt na Braidon Burns i bin mekim asua long gem egensim ol Newcastle Knights long las wik Sarere na ol i rausim ol.

Ol i sasim George Burgess wantaim wanpela strong-pela takel na bai em i no inap pilai tupela gem.

Hymel Hunt i bin kisim sas

long em i bin mekim wanpela hai takel na bai no inap pilai 4-pela gem.

Ol i sasim Braidon Burns long em i givim wanpela solda sas na bai no inap pilai wanpela gem.

Long wankain taim, lo bilong NRL i painim aut olsem fowod bilong Broncos, Sam Thaiday, i no bin mekim asua long ol i sasim em long

kontrak kondak bilong em.

Eels pilaia, Tepai Moeroa, bai no inap stap insait long wanpela wik bikos lo bilong NRL i painim aut olsem em i bin asua na givim solda sas long Ashely Taylor.

Josh Starling bilong Newcastle na Apisai Koroisau bilong Manly bai pilai nau bihain long ol i bin sasim tupela long ol gem bipo.

Chris Grevsmuhl i joinim Titans

GOLD Coast Titans i tokaut long ol i bin sainim kontrak bilong Chris Grevsmuhl, husat bai pilai wantaim ol long tupela sisen, 2017 i go inap long 2018.

Ol Penrith Panthers i lusim kontrak bilong Grevsmuhl long Novemba las yia bikos em i gat sampela asua bilong em yet na Titans i kisim em.

Em i bin stat pilai NRL long Raun namba 1 long sisen 2015 na em i bin pilai 43 gem long top level na skoaim 10-pela trai bihain long em i bin pilai wantaim ol Townsville Brothers.

Het Kosa, Neil Henry, i bin



Bipo fowod bilong Panthers, Chris Grevsmuhl, joinim Titans. wok wantaim Grevsmuhl Panther na Rabbitoh bai taim long North Queensland pilai gut long NRL resis na Cowboys na em i lukim em i givim wanpela moa olsem bipo pilaia bilong sans long em.

Kolombia i kisim tiket long go long India



Ol pilaia bilong Kolombia i amamas bihain long ol i bin daunim ol Paraguay.

KOLOMBIA i winim fainal ples bilong Saut Amerika bilong resis long Saut 2017 FIFA Anda 17 Wol Kap resis long India.

Ol Kolombia i daunim ol Paraguay, 2-1, long fainal

resis long las wik Sande.

Dispela risal i lukim olsem Venezuela na Ecuador i go aut long fainal stej bilong resis i kamap namel long ol 6-pela tim.

Ol Brasil i kamap sempion

bilong kontinent bihain long ol i bin daunim Chile, 5-0, long fainal raun.

Namba wan FIFA resis bai kamap long India long 6 Oktoba i go inap long 28 Oktoba, 2017.



Gavman tim na Ramu NiCo mekim DSTP Aweanes



HSE opisa Jay Jerry toktok long DSTP aweanes long St. Martins praimeri skul long Lilau long Bogia distrik.

RAMU NiCo (MCC) i bung wantaim tim bilong Gavman long karimaut wanpela wan wik aweanes long Dip Si Teilings Plesmen (DSTP) stat long Bogia distrik, Sumkar na Madang.

Aweanes i bin stat long Bogia long Saint Martin praimeri skul long Lilau long Tunde, Mas 14, na bihain long Trinde long Matugar viles long Sumkar, na long Fraide, Mas 17 i bin kamap long Siar viles long Madang distrik.

Insait long dispela aweanes ol opisa bilong Gavman na Ramu NiCo (MCC) Helt, Sefti na Enviromen Dipatmen i tok-save na givim infomesin long wok bilong DSTP sistem we Kampani (Ramu NiCo-MCC) i yusim nau long Basamuk Rifaineri long Raikos distrik.

Bikpela samting long dispela DSTP aweanes em taim ol opisa i tokaut long ol pipel long ol kostal viles komyuniti olsem dispela sistem em Ramu NiCo i yusim long tromoi pipia bilong en i go daun long plua aninit long solwara em seif.

Ol lain bilong Gavman husat i helpim ol lain Ramu NiCo HSE tim long tok klia long posisen bilong gavman long Projek na DSTP em Mineral Risoses Atoriti (MRA) na Konsevesen na Enviromen Proteksen Atoriti (CEPA) i luksave.

Moa long en tu, long dispela aweanes ol opisa bilong gavman olsem Robert Sine bilong CEPA i tok klia tru olsem DSTP sistem em ol narapela maining kampani

long PNG tu i yusim nau i stap. Pastaim tru em Misima Mains long Milen Be i bin yusim DSTP sistem. Tude, tupela maining kampani husat i go het long yusim DSTP sistem em Lahir Gold Main na Simberi Mains long Nu Ailan provins.

Gutpela bekim i bin kam long ol lain long Bogia long Lilau komyuniti taim Het Tisa long Saint Martins' praimeri skul, Benny Apuki i tok ol pipel i amamas olsem Ramu NiCo wantaim lain bilong gavman i go aut long tokklia na givim infomesen long wok bilong DSTP long Basamuk.

Em i tok planti taim kain kain paul toktok save kamap olsem ol pis long solwara i dai bikos long kemikol i go daun long solwara long Basamuk Be. Dispela em gi-aman toktok.

Moa long en tu Mista Apuki i amamas olsem Ramu NiCo i bringim aweanes i go long ol skul sumatin tu bikos ol dispela lain bai kamap lida na hetman na meri long bihain taim, na em gutpela olsem ol i mas kisim stretpela infomesen long tokklia long papamama bilong ol na ol arapela long famili.

Ol Ramu NiCo HSE opisa i givim gutpela taim long tokklia long ol manmeri long ol kostal ples long wanem ol proses we Kampani i yusim long stretim ol teilings o pipia pastaim long ol i tromoi i go daun long plua bilong solwara long Basamuk Be.

Aweanes long Siar viles long Madang distrik i lukim tu wanpela pleintif i givim

toktok bilong em. Nem bilong dispela pleintif em Tamlon Tab, na em i askim planti kwesten long sait long teilings i go daun long solwara i ken kam bek antap, na ol arapela kwesten long sait long kostal enviromen long Madang.

Ol lain bilong Gavman tim na HSE opisa bilong Ramu NiCo i givim gutpela bekim long em na tokklia olsem i gat ol leiya bilong solwara i stap, we ol pis na animal i ken kisim lait bilong san na win. Narapela leiya em ples we ol kolim apweling, we ol pipia save stap na em kol wara na hot wara save bung na mekim solwara i kirap, na narapela leiya em tu i stap tasol em tudak tru na no gat pis na animal i save stap.

Moa long en tu Ramu NiCo i putim paip bilong en long rausim pipia i go daun 150 mita na dispela i abrusim ufotik zon we san-lait save go na pis save stap. Em i putim disaj paip bilong en daun moa long ol zon we ol pis na animal save stap.

Dispela ples em pipia i go daun em daunbilo tru na trempritsa i liklik tumas o no gat win na pipia we i go sindaun daunbilo bai no inap kam bek antap.

Planti lain husat i stap harim aweanes long ol tripela ples long Bogia, Matugar na Siar i amamas olsem Ramu NiCo i go aut long tok save na givim infomesen long ol komyuniti. Dispela bai givim ol belisi na ol bai save olsem DSTP em seif na wok Kampani i mekim i no kamapim birua long solwara.



Ramu NiCo Komyuniti Afes opisa, Ivan Mullul i opim aweanes wantaim toktok long Lilau, Bogia distrik.



Madang Provinsal Gavman Mains Kodineta, John Bivi (lephan) i skelim toktok bilong wanpela bikman long Matugar viles long Sumkar distrik.



HSE opisa Shiela Danga serim infomesen wantaim ol sumatin.



Aweanes long Siar viles long Madang distrik.

KBK Mining → **135 KM Slurry Pipeline** → **BSK Refinery**

Monagi i setim nupela rekot

PAPUA Niugini etlit, Andrine Monagi, i setim nupela rekot long heptathlon long autdo trek na fil sisen long USA.

Monagi i setim nupela

rekot long NCAA Divisen 2 Sempionsip long las yia na nau em i setim nupela rekot bilong em yet we em i winim mak insait long 14.34 seken long 100 mita hadel.



Andrine Monagi i ran long 200 mita resis.



Andrine Monagi i ran long 200 mita heptathlon resis long Mas, 2016.

PNG Masta Swiming tim i winim gol

PAPUA Niugini Masta Swiming tim i winim 10-pela gol medal, 3-pela silva medal na tupela brons medal long Australian Masta Swiming resis i bin kamap long Gol Kos Ak-watik Swim Senta long Sautpot, Australia long 8 Mas i go inap long 11 Mas, 2017.

PNG Masta Swiming tim i gat 7-pela swima em Annika Seeto, Ben Fretten na Anna-Liza Mopio-Jane i gat kris-mas namel long 25 i go inap long 29, na Ashley Seeto, Dimity Frazer, Shannon Liew na Ryan Pini i gat krismas namel long 25 i go inap long 39 i bin resis long dispela sempionsip.

Ol PNG Masta i resis long wan wan resis bilong ol, miks medli, miks fristail riley, na medli na fristail riley tim bilong ol man.

PNG Masta Swim tim i winim gol long olgeta riley resis.



Ol swima bilong PNG Masta Swiming Tim i apim plak bilong PNG bihain long ol i winim gol, silva na brons meda long Australian Nesenel Masta Swiming resis.

Na tu, ol i brukim rekot bilong Australia long 4x50 medli riley resis bilong ol man wantaim 4-pela seken. Dispela rekot em ol i bin putim long 1989.

Wan wan risal bilong PNG Masta Swiming taim em;

Frazer i winim Silva long 50 mita bekstrok;

Liew i winim Silva long 100 mita breststrok, Brons long 50 mita bekstrok na 50 mita breststrok;

Mopio-Jane i winim Gold long 50 mita fristail na 50

mita bekstrok;

Pini i winim Gol long 50 mita bataflai na 50 mita fristail;

Ashley Seeto i winim Gol long 50 mita breststrok, 100 mita breststrok na silva long 50 mita.

Metro Rangers i kwalifai long Ipatas Kap fainal

SANSO Metro Rangers em i namba wan tim long kwalifai long fainal bilong Coca Cola Ipatas Kap fainal.

Rangers bilong Enga Provincs i daunim ol Kinspa United bilong Maun Hagen, 23-8, long las wik Sarere na i daunim ol Giluwe Tigers bilong Sauten Hailans, 12-10, long Sande, long Minj Ragbi Lig pilai graun long Jiwaka.

Namba tu tim long kwalifai long Westen sait em ol bai tokaut long Fraide bihain long resis bai kamap namel long Kerex Ranger bilong Jiwaka na A1 Hawks bilong Enga.

Tupela tim long Westen sait bilong pilai las 23 minit bihain long ol i rausim resis bilong bipo bikos i gat wan-pela asua i bin kamap.

CCIC judiseri siaman bilong Jiwaka PPC sif supaintenden, Joseph Tondop i mekim disisen long ol i ken pilai las 23 minit long dispela Fraide apinun long wankain pilai graun.

Fainal bilong Isten sait em ol bai tokaut bihain long fainal resis bai kamap long Goroka.

Nupela spot fesiliti long Juni Praimeri Skul

OL sumatin long Juni Praimeri Skul long Hela Provincs na ol yangpela lain klostu long Hides Komyuniti i gat nupela basketbal kot bilong soim skil bilong ol.

Opereta bilong PNG LNG Projek, Exxion =Mobil PNG Limited, i givim basketbal kot i go long han bilong Juni Praimeri Skul long Februeri bihain long ol i bin stretim.

ExxonMobil PNG i kamapim wanpela yut empawamen program aninit long patnasip wantaim Basketbal Federesen bilong Papua Niugini (BFPNG) na i save bungim ol wantaim basket bal resis long karim aut laip-skil trening na Olimpik veliu awenes.

Dispela kos em ol i bin

kamapim long Juni Praimeri Skul long Novemba 2016 na i lukim 16 sumatin long gret sikis i go inap long gret eit, 4-pela tisa na 16 yangpela lain i stap long long dispela kos.

Ol i bin lainim ol rul na lo bilong basketbal, ol teknik, laip skil trening na Olimpik velu edukesen.

BFPNG na ExxonMobil PNG i painim aut bel hangre bilong ol pipel aninit long dispela kos na ol i stretim Juni Praimeri Skul basketbal kot.

"Spot i save strongim mipela long stap long gutpela helt na skulim mipela long wok strong long grup bilong winim mak," Hides Ges Kondisening Plen fil supaintenden bilong ExxonMobil PNG, Sagayaraj

Martin, i tok.

"Ol i ken kamap gutpela pilai wantaim stretpela skil na save bilong spot na gutpela tingting na disiplin em i bikpela samting bilong developim yupela yet olsem spot manmeri na gutpela lida bilong PNG."

Het tisa bilong Juni Praimeri Skul, Shelly Kaiabe, i tok olsem ol i gat bikpela amamas wantaim ExxonMobil PNG bilong ol i senisim basketbal kot i kamap nupela gen.

"Tenkyu ExxonMobil PNG long sapot long helt na gutpela sindaun bilong ol pikinini bilong mipela. Mipela olgeta i gat bikpela amamas long yusim dispela basketbal kot," Kaiabe i tok.



ExxonMobil PNG i stretim basketbal kot bilong Juni Praimeri Skul long Hides, Hela Provincs.

NHC i winim premia divisien netball gren fainal



Pilaia bilong NHC i laik tromoi bal i go insait long net.

Philemon Tame i raitim

NATIONAL Housing Corporation (NHC) i daunim ol National Fisheries Authority (NFA) 1, 22-16, long premia divisien gren fainal resis bilong Pablik Sevan Netbal resis long las wik Sarere.

Resis i kamap long Rita Flynn Indo Kot. Planti lain i pulap long lukim dispela gren fainal resis.

Pilaia bilong ol PNG Peppers, Jeperth Tulapi, i go

pas long ol NHC na ol i stap pas long taim bilong malolo wantaim 14-8 poin.

Ol gel bilong NFA i kisim strong long ol sapota na i pilai strong long namba tu hap,

tasol namba wan kala bilong Tulapi i soim egensim ol birua na skruim skoa yet wantaim sapot long ol poro pilaia.

Ol NFA i sotwin na NHC i win wantaim 6-pela poin.

- Narapela risal bilong gren fainal i lukim:
- Division 1: Finance (1) i daunim BPNG (1), 29-15
 - Division 2: IOPP (1) i daunim NFA (2), 24-19
 - Division 3: Parliament i daunim BPNG (2), 25-24
 - Division 4: IRC i daunim Finance (2), 33-24
 - Division 5: PNG Forestry daunim NICTA, 19-14
 - Division 6: IOPP (2) i daunim Communication, 23-21
 - Division 7: CSTB i daunim BPNG (3), 22-14

Barramundis i go pilai long UAE

HEBOU PNG Barramundis i lusim kantri long las wik Fraide long go raun long Yunaitet Arab Emirets (UAE) long Midel Is.

Lukluk raun i stat long Tunde, Mas 21 i go inap long Epril 14.

“Ol skwat i mekim wok redi long ol trening sesen bilong ol insait long 5-pela wik,” Het Kosa, Dipak Patel, i tok bipo long ol i lusim kantri.

“Ol skwat i trening gut long bungim ol salens long dispela wokabaut, tasol weda i no orait na i bagarapim skil trening bilong ol.

“Namba wan taim bilong ol Barramundis long pilai egensim ol English County tim na dispela em bikpela salens we ol bai luksave.”

Ol bai pilai tripela womap

resis egensim English County tim bipo long pilai egensim ol United Arab Emirets long tripela Wan De Intenesenel, wangepela ICC Inta-Kontinental Kap (ICUP) resis na tripela Twinti20 Intenesenel resis.

Dro bilong HEBOU PNG Barramundis wokabaut raun resis.

Tunde, 21 Mas, 2017-HEBOU PNG Barramundis egensim Middlesex (50 Ova).

Trinde 22 Mas i go inap long Fonde 23 Mas, 2017-HEBOU PNG Barramundis egensim Yorkshire CC (tupela de)

Monde 27 Mas, 2017-HEBOU PNG Barramundis egensim Middlesex (50 Ova)

Fraide 31 Mas, 2017-HEBOU PNG Barramundis

egensim UAE (ICC WCLC resis 1).

Sande 2 Epril, 2017-HEBOU PNG Barramundis egensim UAE (ICC WCLC resis 2).

Tunde 4 Epril, 2017-HEBOU PNG Barramundis egensim UAE (ODI)

Fraide 7 i go inap long Mande 10 Epril, 2017-HEBOU PNG Barramundis

egensim UAE (ICC ICUP).

Trinde 12 Epril, 2017-HEBOU PNG Barramundis egensim UAE (T20I resis 1).

Fraide 14 Epril, 2017-HEBOU PNG Barramundis

egensim UAE (T20I resis 2) long moning.

Fraide 14 Epril, 2017-HEBOU PNG Barramundis egensim UAE (T20I resis 2) long apinun



Ol skwat bilong HEBOU PNG Barramundis.

Raun 1 bilong softbal fainal i pinis



Ol meri i resis long kisim ples long go long gren fainal long Pot Mosbi Softbal resis bilong ol meri.

Philemon Tame i raitim

RAUN namba wan fainal bilong Pot Mosbi softbal resis bilong ol man i kam mak long las wik Sande.

United Brothers i daunim ol Stingers, 4-3, na Bears i daunim ol PNG Power, 5-0, long B gret fainal resis na rausim ol PNG Power.

Long A gret divisien, PNG Power i daunim Brown Eagles, 10-1, na United Brother i daunim ol Defence, 7-3.

Ol Defence boi i wetim neks sisen long resis.

Ol PNG Power bai salensim Yokomo long kisim ples long gren fainal resis na ol Brown Eagles bai pilai egensim ol United Brothers long kisim ples long semi-fainal.

Long wankain taim, ol Yokomo i daunim ol Mariners, 11-4, long long las wiken long B gret bilong Pot Mosbi Softbal resis bilong ol meri long Bisini pilai graun na i kisim ples bilong gren fainal resis.

Ol Mariners i gat wangepela sans i stap yet we ol bai salensim ol United Sisters long dispela wiken long long lukim husat bai salensim ol Yokomo long gren fainal.

Long A gret divisien em ol United Sisters i kisim ples long gren fainal bihain long ol i bin daunim ol Bears, 10-4.

Ol Bears bai salensim wangepela wina bilong gem namel long ol Yokomo na Wantoks long semi fainal resis.



Namba wan fainal bilong Pot Mosbi Softbal resis namel long ol man.

Dwellers i pinisim namba 3

LAE City Dwellers i pinisim namba 3 long pul C resis bilong ol long 2017 OFC SEmpions Lig long Nu Silan.

Ol Dwellers i bin opim resis bilong ol wantaim, 5-2,

win egensim Malampa Revivors bilong Vanuatu.

Namba tu resis bilong ol i bin kamap long las wik Trinde we ol i lus egensim Auckland City, 2-0.

Western United bilong Solomon Ailan i daunim ol, 5-3, long las wiken.

Auckland City bai resis egensim ol wina bilong grup A na B long semi fainal.



Tim C Group long PMSA pri sisen. Ol bai go insait long fainal dispela wiken.



Pilaia bilong Mungkas i pasim rot bilong pilaia bilong Guria long nokaut fainal soka pilai bilong ol long Bisini. Mungkas bai go insait long semi fainal dispela wik long pilai bilong ol meri.



Ol meri Yokomo, ol i aut long fainal bilong sofbal long wiken na bai redi long klap sempionsip long Madang long Novemba.



Midfilda bilong PS Rutz wantaim bal i ranwe long pilaia bilong Manena long pilai bilong ol long wiken. PMSA bai holim ol fainal pilai bilong ol long dispela wiken.



Tim Wantoks bai go insait long kwata fainal dispela wiken.



Tasim bes, rana bilong Brothers i ran kam hom na tasim bes long han bilong em long kwata fainal bilong A gret man.

Ol poto: Nicky Bernard



WHITE TUNA FLAKES
DIANA White



WHITE TUNA insait
K 2.20



Tasty and Flavourful White Tuna for Everyone!

Manufactured by:
RD Tuna Cannery Ltd.

Bisini pilai graun bai kam laip long wiken

Nicky Bernard i raitim

NUPELA Bisini pilai graun bai kam laip long dispela wiken taim ol pilai olsem Soka na Sofbal bai go insait long fainal bilong ol.

Bisini Soka graun bai lukim ol tim stap insait long fainal bai pilai strong long kisim ples long gren fainal we bai kamap long Sande.

Ol kwata na semi fainal bai kamap long Sarere long lukim husat bai go pilai long Sande long kamap king na kwin bilong Pot Mosbi Soka Asosiesen pri sisen resis.

I gat 8-pela tim bilong ol man nau i stap long fainal bi-hain long 6-pela wiken resis bilong pri sisen long Bisini soka graun.

Tim bilong ol meri Mungkas i wok long pilai strong long pri sisen na ol

winim olgeta pilai bilong ol i kam inap long fainal na husat tim bai kisim ol long dispela wiken bai soim moa strong long daunim ol.

Long pilai bilong ol man long dispela wiken i lukim 8-pela tim na dispela 8-pela tim bai pilai strong long traim bringim ol go long Sande gren fainal.

Long narapela sait long Bisini bai lukim Pot Mosbi Sofbal Asosiesen bai go insait long kwata na semi fainal bilong ol long dispela wiken.

PNG Pawa i pawa tumas long daunim ol Eagles long A gret pilai bilong man long Sande las wiken na bai go bungim Yokomo long dispela Sande long bukim tiket long gren fainal.

Yokomo man i bin kisim malolo long las wiken na ol mas tren strong long

bungim PNG Pawa long wanem ol kam wantaim fom bilong ol.

Long pilai bilong ol meri long dispela wiken, sailen kila Wantok bai bungim Bears long semi fainal long lukim husat bai go bungim Sisters long gren fainal.

Wantoks i winim Yokomo long nokaut pilai bilong ol las wiken Sarere na bai bungim Bears long dispela wiken Sarere long painim husat bai kisim tiket bilong gren fainal.

Bears mas putim gut was long ol Wantok long wanem ol save pilai isi na kaikai bilong ol win i save stap klostu stret long ol.

Raun go long Bisini taim yu no gat wok na lukim ol eksen pilai long hap na singaut long wanem tim yu sapatim.



Juliette Seri bilong Yokomo i flai wantaim na tromoi bal. Juliette bai traim long stap insait long Mosbi skwat long go pilai long Kokopo long Ista wiken na redim em yet long klap sempionsip long Madang. Poto Nicky Bernard



Available as:
Delivery van
15 seater
16 seater

NV350
URVAN

Ready to power up your business ?
The all-new NV350 Urvan delivers with style.

- Powerful 95kw diesel engine
- Folding aisle seats
- Large sliding door
- CD player
- Full air conditioning
- Stylish slide window



Photo for illustration purpose only